

漳州府志

卷二十(世二册内)

三五公司所藏

ル 5
3438
20



門 5
號 3438
卷 20

漳州府志卷之三十三 人物六

國朝列傳下 乾隆志卷四十一 後有新增

陳大來

亨道

亨通

率先

吳維圻

鍾

郭宏纘

蔡司霑

黃易

柯願

薛正冠

謝亦驥

劉勃

蔡日光

戴盼

陳聲

鄭之良

蘓潮

沈一葵

昌天錦

王蒼

胡必奇

謝廷憲

彤詔

何子祥

林名世

陳先聲

陳大來字陽開其先龍溪人後徙南靖生而穎異刻志問學順治戊子領鄉薦授寧鄉令時天下初定戶口散亡

早稻田大學圖書館
昭和32.4.16
藏書

十二三賦稅尚沿前弊乃請去繁重免間架銀三千餘
減田房契稅八百兩民困以紓尚寬政不忍加咎迨擢
郴州牧州爲楚塞苗犴雜處俗悍難治大來則曰是宜
立威廉巨奸數人寘諸法屬邑聞風咋舌謂令君固稱
慈善乃持法若此率震懾服教以憂去職遂不復仕家
居課督諸子暇則攜僮僕尋花蒔或偕朋從玩景光冲
然若有以自得者蓋三十年猶子亨造字偕德性閑雅
以誦讀爲娛尤工吟味著有雲園易義及詩集計偕還
過其弟卽墨令亨通與青州名士爲詩文會得疾而卒
亨通字叔嘉以貢生歷宰諸邑殫心于民初任祥符丞

督堤工勸民沿河植榆柳並請修復屯田制以廣儲積
大吏乃悉亨通才擢墊江令以憂歸起補泗水值歲稔
亨通加意撫恤給牛種疏水利以溉田民賴之再補卽
墨擢刑曹道卒膠州卽墨人相語曰吾苦旱令爲我雪
吾苦迫呼令聽我自輸吾患盜賊令爲我捕獲有善政
三我民尸祝俎豆之魂魄猶應戀此也因立祠享祀焉
方亨通之再丁憂也泗水民稔令貧設櫃四門投白鏹
七百錢爲贖郤之不可乃以其半充學宮半修城雉終
不取一錢子率先亦貢生有吏才仕終武岡州牧

吳維圻字畿平鎮海衛人四歲而孤母王氏手續易米哺

之稍長倜儻不羈母嚴乃俛首治舉子業以所爲文贄
何黃如經指授豁然頓悟嘗會文鄴山日成數藝多驚
人語爲黃石齋賞識由是有聲以順治戊子選貢授彰
德府叅軍刺史偉其才時詔以政郡多盜維圻設法偵
謀殲其魁又請鄉各懸應鼓爲寇警援盜發輒獲尋遷
令清豐其俗勁鷲少文維圻至新學官教以冠昏喪祭
四禮民風一變却常例錢無敢干以私者富商羅重法
介鄉貴以千金請峻拒之獄成頌廉明焉將告歸直指
使孔興鍾微服察治狀父老歎息稱吾令君長者今以
衰老欲引年去可柰何直指心異之固留維圻而歸志

已決具言少時母子熒苦遭亂遷徙無家不得已爲祿
仕自恃餘生無幾願歸故里修治先人坵壟直指憫其
志遂許焉去之日百姓泣送數十里抵家尋以疾終維
圻魁梧奇偉雙眸炯炯有光懷抱奇才未究其用士論
惜之子鍾字惺菴少時奉母避亂龍山母病思飲長流
水越數里夜汲爲盜所得詢知其故舍之去第石長蚤
世第婦趙氏撫遺腹子景鴻盡以已產讓之教讀自給
工詩古文詞尤以制義鳴登康熙甲戌科進士任內邱
知縣與守忤投檄歸

郭宏纘字子參漳浦人明季諸生時方多事宏纘因究心

韜畧 國初以明經從貝勒入闕有功授乳源令禁濫
派免宿逋民因以蕪歲丁亥山寇竊發侵縣邑乳源孤
城岌岌然官民懼不克保宏纘從容部署密請援于外
連日轟飲堞樓上佯爲不知有寇者賊謀知果心易之
翼日援兵集宏纘突出乘不意多鼓鈞聲渡河橫擊之
俘斬無算邑賴以全初乳源令死于兵當軸以宏纘威
重故任之卒成奇功在任三年橐無餘金去後民愈思
之

蔡司霑龍溪人順治辛卯舉人知東流縣興利捍患如不
及歲大旱捐俸賑卹具菑黎上報大吏駁核再三司霑
堅執前後得免賦一千八百六十兩又奉上官檄發穀
九百餘石按戶散給飢民泉流人士爲詩頌德改宜興
脩縣志建義倉亦施德于民並著聲

黃易字子參漳浦人寄籍應 甲中順治乙亥進士當遷移
令下流民失業易詣闕陳狀爲當道所沮而止授歸化
尹廉幹有聲邑防守將弁暴悍商人倚恃藩邸肆毒平
民易具牘力陳之大府悉除去時單騎巡行阡陌問閭
閻疾苦民甚德之耿精忠反削髮變姓名間道入粵粵
東繼叛遁入江右聞 康親王度仙霞乃詣軍前自劾
王嘉其忠疏于

潮州府志 卷之三十三
朝七得

旨議敘遽以疾卒

贈按察僉事祀歸化名宦

柯願字又鄒龍溪人幼能文然遇試輒窒順治辛丑始成
進士除藁城令以循吏獲薦

賜章服中以誥誤歸起補東安方四十日敘擢禮曹典試
山左旋權蕪湖閔悉除去常例復管大平倉支收有法
願歷數任皆以勤慎集事居鄉十餘載與里閭同心設
法弭盜一方無警

薛正冠字卓子長泰人登順治丁酉科任永興署郴州資

陽皆有惠政永興里民月供令薪水錢六十緡行之已
久正冠惻然曰吾赤子膏血也立除之兵燹後城垣剝
損以農隙勸民脩治不日竣功時值清丈田畝按則例
行之民感其不擾以疾告歸永民肖象祀焉

謝亦驥字玉路龍溪人弱冠補翁子頃小試輒定其曹屢
躡于場屋時爲詩歌古文以自樂康熙乙卯歲薦試京
兆爲韓慕廬莢錄取年五十矣又十餘年始補丹陽尹
地衝民力凋瘁亦驥至寬征入省徭役踰年民歌其德
以老病乞休旣歸居東郭倉園中與李基益爲文字友
對攜一杖逍遙山水間作雙杖歌卒年八十八著有浩

園詩草丹陽集

前志論曰曩歲過丹陽策蹇躑躅雪泥中晚投野人
宿聽談謝令舊事殊嘖嘖近世作令不乏良材而一
官傳舍視之民亦以羈旅視其令亦驥獨以欵誠留
去後思民情大可見信夫

劉勃字幼安龍溪人以能詩鳴登康熙壬戌進士授遂平
令時隣省大饑流民入境就食勃書其數而撫之既
朝廷令有司籍流民諭富室有能送流民還鄉者以家口
計賞獨遂平令籍先具擢戶部主事轉吏部有閩縣令
苛刻虐士事聞下部議令厚賂當權者欲阿之勃堅持

不可令竟落職士氣賴焉卒于官著有寄園文集修廬
類纂行于世祀鄉賢

蔡日光字于章龍溪人父時中順治辛卯舉人日光稟承
儒業邃于經傳與同里鄭亦鄒齊名人謂蔡經鄭史登
康熙甲戌進士爲綦江知縣有惠政綦士治經不爲易
學日光曰易五經之原也何可獨缺爲刻周易傳義以
庋學宮月課諸生經解一通是科鄉闈以易雋者四人
及去任綦士祠之榜曰易教開先晚年里居飭名節時
稱其廉介

戴盼字子質龍溪人性警敏過目成誦少逃亂復困追呼

諸兄嘗翼蔽之盼顧跌宕自喜讀書草堂聲琅琅徹午夜方是時海寇爲患漳上連年盼時時仗劍升高山望漳南形勢作封侯想曰伊川大儒樂觀史書垓下之戰真好意象及讀范希文所以語張子厚者洒然一笑下帷講誦康熙甲戌登進士第授長垣令長垣河北劇邑也盼剖決如流有健豪爲害鄉里事發請張獄三年不決親履其地折以片言竟泥首服孱民謹呼頌神君卽其地建生祠焉丁母憂歸遂不出一日入郡城見舊宅歛傾慘然曰先子遭變祝天處也亟新之未落成而盼卒盼才高下筆雄邁奇偉與文士訂南州會同學皆下

之晚尤喜吟詠風調芋絲古文詞自寫胸襟不入俗體更善鑑人里有擇婿者諮于盼盼曰某生南宮秀也可不數年其人果登第卽莊副使亨陽也族孫侯焜亦馳古文嗜史學著史貫二十一卷登科時年七十矣後授

國子監學正

陳聲字仲希長泰人幼穎異寓目成誦由丁卯舉人合山右甫下車革除弊政十六事民翕然頌之值荒災流徙遍郊野聲心惻曰民急矣若拘文法待奏請恐不濟乃發倉以賑十二廩穀皆斥奉以補又代民完逋賦千餘金或以近名譏聲曰吏職耳不見唐馮元淑乎檄吏胥

循行四境有餓莩卽收瘞之再調任盡心厥職告歸家
居十餘載卒聲宰三邑永和和順和平因號三和逸吏
著有霞溪集

鄭之良字用三龍溪人康熙丙子舉人授林縣令林俗死
無後者族不爲立嗣而朋分其產之良諭以大義嚴禁
之風一變邑素未聞學爲廣開書院延名儒給廩餼以
植士士氣日奮雍正乙未西師興籌辦軍需無所缺誤
戍戍檄督運出塞同官皆詫之良文儒歷沙場萬里爲
難之良獨恬然以行撫循徒旅人不痛吁覩塞外風光
時揮鞭吟咏以示整暇返役陞主事出知岢嵐州州故

邊地難理之良察疾苦減耗羨革官供殘黎日有起色
以老致仕長子可權侍歸擁雪早行山東道上見遺橐
金道旁停車俟而返之爲人懇摯溫和一鄉稱善士次
子允植舉優貢入太學

蘇湖字景韓長泰人幼穎異八歲能文有神童之號康熙
己卯舉於鄉授柳州今調荔波在任十三載有惠聲荔
波舊不設學潮以學校爲教化之本建立學宮日集諸
生講授文風蔚然遷行人教習奉恩輔國公以病告歸
著有霞城賦燕遊草越遊草

沈一葵字日賓詔安人也祖樹良行誼純篤稱鄉里一葵

少穎敏博覽經史丙戌成進士選授陽曲令甫下車會
大師出塞西征芻糧先事籌畫不擾民又連歲苦旱民飢
捐俸賑恤并權借庫銀三千餘金子民而變產以償陽
曲士未屬於學脫鄉舉十五年乃倡建義學聘名師以
培俊秀遂踵起取科第既又大旱步禱五臺山信宿而
霖雨大霈三日夜乃止大中丞異之列薦牘第一遷沁
州牧教民積穀防災民歌來暮嗣攝潞安守篆潞安亦
苦旱一葵甫至而甘澤溥沾潞人謠曰隨車雨也蒞任
一月

特簡江南徽州府徽民額徵爲豪右包收乾沒積欠至三

十餘萬痛爲釐革其弊復多方設法寓催科於撫字中
民爭輸恐後不一年完解正課銀二十九萬有奇民脫
逋累服其能而懷其德三年任滿調山西汾州府一葵
治汾如治徽卓有成績入補授刑曹因病解歸里居三
載以壽終自爲令至守郡皆繁劇之區治行前後不渝
稱循良吏無愧云

昌天錦字漢瞻龍溪人父文燦登康熙丁卯科天錦亂年
警穎文燦奇愛之口授經書過目成誦文燦歿天錦年
十五依於祖每哭父慟絕家人曰大父至矣卽收淚不
敢出一聲弱冠補弟子員當是時郡文士聯東江會並

名宿獨天錦年少廁其中咸加推重曰英哉昌子康熙辛卯舉於鄉乙未成進士謁選得山西壽陽令引

見奏對詳明授涿州知州甫下車會水災民饑按口賑給

不假手胥吏復於南關立普濟堂以養病者一時有千

萬饑民盡飽餐之謠州故衝有勢要子弟徵車車戶互

推委忿爭斃命天錦承讞執法不為顛預竟忤上官改

教職代者承意苛求滯留六載同鄉宦都中者稔狀慰

之曰子例得開復天錦顧以其母春秋高事楚則束裝

歸省欣然也改補邵武教授在任十年整躬訓行風教

整然從弟錫晉字耀西為古文詞有法度詩清雋得唐

人風調乾隆戊子舉人年四十卒

王蒼字伊人長泰人性簡脫而和易朴誠無賢愚少長親

疏皆暱之康熙乙未登第後即告歸養母越二十餘載

始赴選令來賓來賓越西小邑民獯雜處每年稅役唯

唯聽冬頭命維謹冬頭者主呼召村民者也皆土人桀

黠者為之欺獯人恇憊藉有司令驚嚇之叫囂衝突丁

男他出則以妻若女代役甚且雜獯之過奴婢及輸納

正賦又巧法侵牟為奸利入數倍漫不敢訾省蒼冬日

偶行村落村人寒無衣見吏至咸哄然避去蒼召而慰

之曰勿怖官汝父母也詢問疾苦具悉顛委乃除去冬

頭平征徭別男女徭民出入縣門吏無敢呵間以餘閑
陟降原嶽爲指示山川形勢向背宅里所宜情詞藹藹
若家人徭民環而膝拜號之爲佛一時賢聲達省會大
吏調繁宜山未幾以註誤旋里環堵蕭然吹竹彈絲以
自樂或偕朋從登山臨水講堪輿之術終不詢家計年
八十四卒始來賓未知學蒼爲立鄉校課文藝邑人之
興於學也台蒼始徭俗於所親者臨別必唾其面以誌
愛蒼之歸也百姓咸依依不忍舍乃群而唾之蒼好潔
唾滿面亦不忍拭去

胡必奇字仲郊南靖人父而居有勇力當山賊余角之亂

破擾山砦而居左手抱父右提戈向賊賊皆披靡必奇
短小精厲胸次瀟然有逸致好吟詩衝口出登康熙癸
巳科教諭福清士志歸向授浙江宣平令邑有官逋數
萬必奇至舊尹七八咸負累羈留通謁嗚苦狀慨然曰
吾貴也逕許之歸而徐陳之大吏請蠲免歲除荒糧千
八百兩有奇兵米一百十九石嘗以事行治內宿富家
樓夜靜就寢矣忽竈烟裊裊從窓戶入瀾漫一室急側
視一老嫗方自炊作食狀甚戚詢之卽富人庶祖母也
必奇忿不寐黎明召而重責之曰爲子孫當如是耶諸
村落聞之咸惕息無敢遺其親者迨告歸民爲立祠堂

橐蕭然日與生徒講貫或時嘯咏以爲樂卒年八十一
著有西野文集詩草行于世

謝廷憲字簡臣詔安人也年十六補博士弟子員旋見知
于督學汪薇貢入成均四明陳汝成署詔安令得廷憲
文奇之造門請見由是名大噪詔安近粵東揭陽饒平
諸生爭執贄及門後先成進士多經其指授廷憲於朱
子四書解體會獨真詣深極微遠近學者宗之晚得壽
寧教諭考課經義而歸之實行多士尤傾服告歸家居
敦厚有古人風教養諸弟至于成立四弟彤詔以家貧
欲廢業力勸勉之彤詔感兄意發憤自強思有所建樹

于後雍正癸丑成進士令鳳翔邑有規例歲數百金爲
羨費峻却之長官道經治所厨傳供應皆出祿餘不以
累民鳳翔爲古扶風名區而甲科寥落乃捐修文廟月
課生童規定甲乙以振之是科邑士李莪遂得第邑北
鄉民多居陶穴穴崩民壓焉急馳視給官楮屯民業亡
尚徵額代納至數百金舒其困蒞任四載以爲常去任
之日父老子弟餞送百餘里不忍去僉謂廷憲兄弟位
望雖未顯而則之古秩官中其立志忠實處爲醇儒出
爲良吏以視唐施士丐元魯山庶幾焉

何子祥字象宣平和人乾隆辛未進士少喪父受書于兄

未幾兄卒念及輒滯下率衆建向文書院以宗祀紫陽而并及姚江著其功也選授浦江合絕私謁清陋規興浦陽書院以勵文教表鄭氏義門以振民行民翕然向風調繁平陽所以便民者一如浦江修城濬河皆捐俸以充民不擾庚辰壬午同考所得皆知名士癸未乙酉歷辦大役有勞績加通判銜尋以疾卒于官兩邑民如喪慈父皆立祠祀之天性孝友能以實心行實政臺使者常定其考曰悃愾無華月計有餘可以覘其概矣所著有蓉林筆抄皆錄其政績

林名世字占有詔安人也父懷材以孝聞九歲失怙英在

五島山去縣城甚遠遇狂風雨輒奔視哀憫鄉里矜其行有沈氏以女女焉生名世篤行好學壬申登賢書丁丑成進士授山西猗氏令在任四閱月禮士愛民以不能事上官改汀州教授皇隸子與試歸化廩生遵功令擯之忤郡守予杖并示意學師勿送歲考名世極力調護諸生感之尋罷職歸恬守家園年七十無病終

陳先聲字偉文平和人乾隆癸酉舉人少重默不鎮人以氣而儕輩皆下焉篤于學問尤邃諸經甲戌會試中明通榜除建寧教諭卽以其素所心得者推以教人規言矩動具有法守嗣調臺灣鳳山學海外諸生傾心嚮慕

稱人師秩滿陞浙江分水縣先聲不怠仕進而部催峻切途往蒞任後凡有張弛一視民心所嚮背行之上下相安庚寅克同考官所得多名下士旋解組歸貧不能具裝抵里四壁蕭然

論曰

國家昇平百四十餘年矣休養生息惟賴有地治之官父母而師保之觀西京循良更多盛于武宣之世亦其時為之也陳大來吳維圻等皆聞龔黃卓魯之風而興起者遭逢盛世脩周官本俗保息之治以安萬民聚百物諸君子能助流政教留遺愛于斯民可不謂

邦家之基社稷之衛乎

李孚祉

廷球

國祥

葉

任

附柯

求

藍忠

鄭

埏

附郭

董

允宗

黃亦曾

蔡汝端

邱永彭

黃

羽

何其芬

陳元麟

阮道泰

王瑞麟

洪瓊光

余士前

陳茂椿

李孚祉字受公明慶遠推官京元之次子也幼警敏長聰慧過人經書接目成誦年十八補博士弟子員時值鼎革京元鍵戶不出孚祉欲成父志無意求名偶遇賓興必促之乃行順治十一年海寇入漳郡肆掠村落索金帛乃以刃劫京元于寢孚祉奮身前衛傷臂抱父不捨

庶母黃氏爭前護翼推使退弗肯從俄而胸背俱劍血
暈仆于地賊憐之散去父獲免然自是臥瘡經年屢瀕
于死當道聞其名求一見卒堅辭子廷琳字雍石六歲
喪母哀毀若成人事繼母如母愛弟之子如己子歲饑
平糶施粥義聞著鄉國生平力學而坎壈老且病尚應
科舉雍正壬子姪國祚舉于鄉喜曰吾不恨矣國祚字
子安博極群書少時卽見器於蔡宗伯世遠乾隆丙辰
成進士未及謁選而卒性恬淡好學旣成進士猶肄業
芝山日與文士角藝不倦家居以詩酒自娛長於制舉
業尤工聲律著有覆篋等秋等集若干卷

葉任長泰野人也與林傑同里戊子歲傑從山寇爲亂掠
任父殺之後傑歸耕嶺上任以墾田爲名遇傑於山亭
揮鋤砍其頭死自詣獄請罪有司義之寬其獄得不死
時有柯求者亦長泰人其兄爲劇賊林掠鴿所殺及掠
鴿就撫求荷鋤伏道左斃其不意斷仇頭首官當事者
竟以撫賊爲竟坐求擅殺棄市君子謂葉任爲孝子柯
求爲悌弟

藍忠字宜侯漳浦人家萬山中故多虎患歲甲子有虎夜
負劍跳梁觸村中屋宜侯之叔裕喊之虎發屋斃裕父
元章聞其弟之有虎患也更大喊虎復發宜侯屋元章

卽地宜侯提長刀鬪虎妻卓氏攜杵從之宜侯舉刀中其咽刃入腹中急不得拔時惶遽慮無以搏虎卓氏呼曰斧乃取斧擊之虎遂斃然元章死矣衆以宜侯不避虎爲孝將白於官宜侯辭曰忠獲罪于天使父叔驟罹禍以沒忠死無及也忠敢以災爲幸衆乃止

鄭珽龍溪人生三歲而孤稍長樵蘇養母年十九未嘗識郡市也每讀父書淚泫泫下或勸之就試笑所號爲顯榮者是司馬季主之所羞耳母誡之曰勿輕言世事吾僅有一子不願汝旦夕去左右也適母病劇珽念所居僻遠醫師卒難致乃夜禱於天割股進之母病果愈族

黨以爲孝呼之曰鄭孝子時有郭銓者亦龍溪人母病月餘割左股熟以進母獲愈邑人陳常夏聞而嘆曰割股非孝也戾於經矣然意可矜也勒石于馬岐道左誌之

董允宗長泰人五世同居男女老稚百餘人合食無間言歷任有司咸旌其廬免其徭役或問之曰君家何以雍睦允宗對曰昔唐張公藝以百忍治家我則異是我傲古人主伯亞旅之法以祖父爲大長伯叔父次之兄弟次之子姪孫次之區土田程農工耕則任之少壯登則上之祖父計口量食餘則貯之每飯爲三等之席以尊

卑爲序食畢婦女亦如之麻絲紡績各婦分治之成則
度身授衣書作夕省不令嬉遊能治書者能從公務者
不煩以胼胝如身使臂臂使指不勞而治君子以董氏
爲善於家政

黃亦曾南靖人幼有至性事父母承順無違康熙十四年
海氛惡甚父陷賊巢舉家皇遽不知所出亦曾年十五
將身赴請代或止之曰吾往而得請則父存子死無恨
也不然有從父地下耳卽昌鋒鏑往賊義而釋之雍正
三年

詔旌其孝亦曾生平廉正不妄取予以考職授經歷

蔡汝端漳浦人少喪父有母與兄世居白石鄉濱海是
時海上勞擾居民悉遷徙內地汝端方五歲母挈之行
兄在後中途猝遇賊與兄相失旋復失母伶仃寄食辛
苦萬狀比長亂定拮据治生稍自立因歸立家室娶婦
入門對食輒灑涕婦怪而問故汝端放聲哭曰吾天地
之鮮民也吾襁褓而吾父歿五歲遭亂失母與兄今幸
有室顧安所得母乎因相與晨夕祝天願得見母居久
之閩人有賈江西者遇老嫗能漳語詢其家爲漳浦蔡
氏歸遇漳人輒述之汝端卽日戒行告妻子曰不得母
吾不返矣糧絕乞於道抵新喻嫗果有南音者次第詢

之信乃跪而哭曰吾母也相持大慟已復作投懷狀觀者皆嘆息泣下曰孝哉是子天賜汝母也母時年七十餘矣負以歸率諸孫奉食飲愉愉怡怡焉蓋至是始知有母之樂也里中有稱其孝者率復歔歔嗚咽以不得見其兄爲恨

邱永彰字光和龍溪人明孝子子能裔孫也至性純篤自能勝衣時未嘗爲父母可怒年十七喪父貧無以葬以哀籲天一日于野取笋供母闕地得白鏹乃克葬每風雨輒奔赴墓下號泣聲嗚嗚然事母力致甘脆不使知其勞有命之應唯進退齊且愉也母歿與妻蔡氏昇以塋躬負土成墳焉先是永彰有兄未室歿稱貸以殯後家入稍裕爲兄立嗣娶婦分田宅如已子推之戚屬亦然貧不能成喪者贖之無後者繼之孤子寡婦各有資蓋少困於貧故稍有贏餘必欲分以及人而後快于心非以爲名也性冲和不與物競與子言孝與弟言悌里有爭訟微言解之終其身不及公庭雍正五年

詔旌表

黃羽字儀伯平和人少孤性至孝侍母疾衣不解帶湯藥必躬親母見其有戚容強慰之曰余病且瘳矣母自苦也時四方雲擾寇亂相仍閉戶不離膝下無何得病病

泗州府志 卷之三十三
目篤悲不自勝顧妻子曰吾不能事母抱恨固極汝能體吾志善事吾母吾死瞑目矣羽爲都督僉事翼之四弟康熙乙卯寇陷漳城翼家四十八口殉難忠孝萃一門異哉

何其芬字苾卿龍溪人康熙丁卯鄉薦兄應祥爲海賊所繫其芬挺身請代賊義而釋之兄弟析箸自取產之磽瘠者歲饑施粥多所全活邑有興築傾已資助之官終沙縣教諭祀鄉賢

陳元麟字石民海澄人父病瞽少小隨侍左右扶掖升降出入無一日離膝下康熙己卯登賢書時元麟文名噪甚僉謂試春官且聲蜚天祿顧以奉親故不忍上公車構一齋曰洗竹承歡數十年如一日父曰復明人謂元麟子孝故天憐汝元麟更惻然侍奉維謹雍正三年謁選得益都引見

上親勞之曰汝陳元麟耶聞汝爲孝子老成端方果不與衆偶江西撫臣視其才果擾殊擢之勿以次抵任三年廉介自持邑有富室某罹重罪以千金求脫元麟蹙然曰吁是墨我也峻拒之卒論如法擢刑部主事越年告歸教授生徒羔雁之外泊如也著有清漳風俗一書

阮道泰字志同漳浦人少穎出孝友異常兒父文負四方志家居不煖席道泰獨與兄奉母母性嚴出入必告有譴必長跪竟曰兄道宏前母出也道泰無大小事悉聽命于兄有間以私殖者不應嘗曰兄弟合食而私異財物畛域如行路遮蔽似穿窬吾恥之交遊多父執處師友間情誼尤摯爲人端雅淵靜嗜學過夜分不寐母禁之不能止父歿訃聞號痛幾絕自是益勤苦肆力于經史爲文章綽有聲譽戊戌秋大風雨壞室廬且牛父及前母俱未葬道泰冒雨撫柩哀號竟日遂以得病病革命兩奴掖以拜母母急持之道泰拜不能起捨地泣曰

兒不孝不能長侍膝下乞以青布衫一襲爲歛勿用緇帛重兒罪也浦人聞者皆爲流涕妻陳氏以苦節著王麟瑞天石南靖縣人八歲喪母哀毀如成人事繼母如所生繼母嘗指以語人曰世言繼母多虐前子但不得如吾麟瑞耳父歿哀痛廬于墓歷祥禫無異初喪里人劉陞將娶婦拮据得數錢忽遺失索之弗得情甚急麟瑞曰果若物耶吾獲之弗敢匿也卽歸之雍正元年舉孝廉引見

上親問之曰若何孝麟瑞曰臣何敢言孝止父母愛子之心無所不至耳

上悅顧語左右是真孝者授永平府未幾擢戶曹轉四川道
監察御史撫然曰吾一介書生驟官清要宜竭力圖報
稱願高堂白髮如甘旨何遂乞歸母歿哀毀逾度越年
卒弟麟祥亦以孝友稱著有易參彙言

洪瓊光漳浦人年十五而父歿未幾兄繼殯弟妹幼母寡
每父兄生辰忌日及春秋伏臘令節毋輒意色慘沮攜
子女涕泣過旬不能平瓊光多方慰節之或巧變爲歡
樂母懷爲之寬母多病病間作瓊光謹調湯藥時而進
之嫂與妻請代弗許欲助之亦弗許曰汝未達恐失其
宜耳如是者率以爲常父之兄子曰玉涵從兄也孤苦
依于母母視若已出瓊光亦奉之如同產爲置室弟妹
長拊攜完婚娶各以期一室之中姊姊三人無反唇兄
弟俱抱子尚依依不忍分析衣食悉仰瓊光瓊光貧賣
藥資生計用其藥者輒效僉曰天憐瓊光乃以靈物賜
瓊光也雍正八年

詔旌其間祀孝友祠

余士前字庸然龍溪人父錫彰賈西洋望加錫娶婦生三
子長十一歲次九歲又次七歲而錫彰歿士前有兄多
疾病家務皆士前肩之及父歿信至士前哀慟拜辭母
兄越重洋奔父喪時乏資未能以柩歸就其地暫殯之

而携三幼弟北還海中有萬里長沙西洋絕險處也船
回遇颶風飄至其島衝石破碎船中人數百胥溺焉士
前手挽三幼弟扳緣匍匐上海巔僅存十七人裸身相
吊仰面四望但見冥途長天環覆巨浸而已有挿一斧
留于腰間者拾泊崖斷竹削之磨斲得火巔上巨鳥成
羣張口欲吞人共搏斃之水淺處多巨蚶可數人舁乃
煽竹火炮二物之肉以充腹渴極羣呼天忽大雨如注
舁巨蚶殼承雨水以救渴在巔中歷九日夜計不得活
合力殺藤撈壞板作槎裹鳥肉貯水于筒乘槎縱所之
士前三幼弟在斷巔猶時自嬉遊及在槎呱呱泣浮沉

萬頃狂瀾中又九日夜同槎死者二人餘亦瞪瞪待盡
忽望巨船從西來解破衣爲招大呼救巨船倏忽近衝
壓槎槎沉復出船上人放下木棚衆急扳登士前忙提
三幼弟入棚挽上船獨自留後槎忽解船上急擲繩繩
滑墜衆復擲一繩唱曰急努力盡此一舉矣士前兩手
扳繩以口咬之卒得上幸無恙隨船到福州携負三弟
乞食歸入門母子相抱哭鄰里環觀盡爲泣下後家人
稍羸乃命其弟買舟往望如錫載父柩歸葬兄弟同居
四十年各有兒孫伯兄先喪所遺男女士前撫之如已
出晚年食指繁乃所以積貲產均分之友愛終身無間

言

貢生陳茂椿龍溪二十九都人祖明節性孝友有三子長志超次銓次自南志超茂椿父也康熙甲寅閩亂豪猾多設機穽陷良民明節被誣繫獄志超年方童稚奔訴之官寃卒白丁巳海氛益熾挈家逃難猝遇賊于路欲殺明節志超哀號乞代賊感而釋之亂平兄弟同居勸二弟力學而身任家計一錢尺帛不入私室述祖父志事著家訓十二條家規十八則家庭雍雍無間言及茂椿長承兩世重大理家政時同祖兄弟十四人子姓繁衍食指幾三千共鼎而食或讀或耕或遠服賈分以贖而任之事茂椿綜其成每月朔望及祀先之日行禮畢茂椿親請規訓反覆敦切長幼男女序立悚然而聽之書古來孝子悌弟貞女節婦行事及里居族民粘壁上使幼子童孫耳濡目染入其家幼者知敬長者知愛內外井井茂椿之教也茂椿博學多聞然敦本行一出于真誠其姊患乳癰家相距二里許日往反數次爲治藥不厭諸弟有病痞塊者一痛連數日夜塾師館于其家偶夜起聞茂椿在床則疊疊談古今逸事或強作諧笑語以舒病者痛嘆曰煖粥炙艾昔聞其事今見其人矣其律身甚嚴動必以禮爲家人率先年踰七十尚不自

暇逸戒子弟曰余祖父家傳全在小心兩字所以為十
二條十八則之本也汝曹敬守之乾隆十七年漳觀察
使單德謨下車旌其門十八年巡撫陳宏謀疏奏茂椿
六世同居奉

旨給銀建坊入孝弟祠乾隆乙酉年卒年八十有五長子士
偉勤學篤行鄉薦時年已四十猶從師受經事親孝遭
母喪盡哀邁篤疾遂卒

論曰卑矣哉蔚宗范氏之識也以李允繆彤之友弟
而列之獨行傳中夫孝友乃本行非獨行也顧自范
氏上溯班氏司馬氏所作列傳未嘗標孝友之名何
歟去古未遠庸德庸行所在多有不一二數也未世
天性涼薄士大夫能以本行自勵者鮮矣况民庶乎
今錄李孚祉王亦曾諸人以風斯世其中如蔡汝瑞
阮道泰之孝余前士之友觀乎此者未有不雪涕也
夫其一往而深不可強而效即謂之天生使獨也亦
可

胡 然 楊 濤 徐登甲 莊士元 登豐

吳開業 元瑞 黃金鐘 宏達 尚錦

天瑞 宏遇 楊國正 日煥 陳 杓

劉鼎鉉 康天墀 偉然 江 觀 詹 恒

王新捷

曾世英

汪洋

胡然字非叔龍溪人少貧力學康熙庚午舉于鄉清脩自好耻干謁有司家居敦摯誠恪與人居終日油油不忍去授建陽學博卒于家

楊濤字大水少喪父奉母以孝聞母歿執喪泣血三年里中人羣曰輟社王脩殆不是過也性耿介不作世俗趨媚容與人交敦懇朴實尤謹于操守弗妄取嘗司族事掌貲財出入濤曰公費也既登諸籍累藏之雖妻子不能知比取用或數十年前所裹紙已朽而封識尚宛然長于文學工草書教授生徒評經論史必窮極蘊奧曲

盡其致以選貢登康熙丙子舉人有同姓藉勢作好事露詭稱濤子以求脫禍且及身一邑人咸驚愕論救謂濤止一子家居不出戶頗聞于官及庭鞠令隸僞服濤衣冠以進使識認其人牽隸裾而哭曰父救我遂得白然濤意以是憂憤死長泰人至今稱真孝廉必推濤

徐登甲字仲升南靖人康熙丙戌進士授福山令七年陞署海州值西陲用兵馬牛車輦不苛民于民而事畢集大吏稱之日能入爲吏部主事致仕歸宦橐蕭然掌教郡城之丹霞書院諸生執經請業者踵相接也年八十有一卒登甲高祖日登遠當明正德間歲飢出粟八千

石以賑官爲建坊旌義官登甲之物海州也州遭水旱流亡遍野惻然曰民急矣古良吏大興工作以備錢當賑貸其法可師也請于上官出帑金三千餘兩築州城令民以工受直困少舒復發倉粟六千石贍諸羸老遂無有殍者君子謂登甲於是乎繩祖

莊士元字殿颺漳浦連江人也後移居郡城生平不苟言笑讀書過目成誦康熙甲午登賢書戊戌成進士未第時有奸人以事陷其伯兄于獄破產以賂猶不免士元乃盡斥已田千餘金助之事得釋家由是貧處之恬然也雍正丙午任北直涑水令涑地民貧悉心撫字民感

其德署前有集官權地稅銀五百餘兩又酒禁例子秋熟時斂金二百兩歲以爲常下令斥除之弛其禁民間子弟秀者於簿書之暇召而教之鼓舞備至初抵任應童子試不滿百以後日漸多文風漸進解組時民賦未徵者爲稱貸完課至三百餘兩新令至欲爲追還士元戚然止之曰吾不忍病吾民也歸田後杜門罕出教授生徒天性忠厚平居未嘗言人過失子登豐字子英亦篤于至性砥礪廉隅清操拔俗士林莫不重之丙子領鄉薦年五十一卒

吳開業字和仲龍溪人四歲喪母父教以讀書知感奮弱

冠父又後益刻苦自勵思有以表見于時康熙辛卯舉于鄉又十四年雍正甲辰成進士授福州教授課士有方調臺灣三載秩滿巡察御史單德謨稱曰能陞祁門知縣悃悃無華愛民禮士恂恂然追古循良吏未幾致仕歸家居二十載廉隅彌飭學者宗之郡邑有興造有司恒就開業及王司虞材二人謀焉開業年較高率身先紳士不辭况瘁掌教芝山勤訓廸歷五載遊其門者咸有立年九十卒都人士以老成凋謝爲恨蓋傷醇懿之未易數數觀也子元瑞字謙孚丙子舉人有至性庚辰上公車都中聞父訃八千里奔喪哀毀遂病瘖至家

益劇竟不起年五十七

黃金鐘字湘玉龍溪人好爲德于鄉鄉人稱之官杭州府丞司權事除常規禁私索著廉惠聲有子九人長宏達字希上以歲貢授建陽訓導卒于官弱冠能文與蔡宗伯世遠會文東江試輒冠其曹獨困于舉場不遇顧未嘗有愠色也金鐘旣筮仕家政悉委宏達宏達爲家督公溥慈恕內外數十口無間疑性坦易接人和藹而馭家嚴肅有法度于所居里隔河建堡築樓或唾之曰昇平安用此宏達笑曰否否吾將立家塾焉歲聘名宿聚族子弟之秀者講學論文于樓中扁其堡心專志壹故

其家羣從諸少率英華雋發負一時文譽漳人士莫不知有湘橋黃氏者宏達涵育成就之功也郡邑有巨役及捐賑諸務僉曰須待宏達宏達有請必至至則率先注籍無少吝次尚錦副貢生任松溪教諭以造士稱宏遇宦廣西州同知力于職事天瑞雍正癸丑進士授刑部主事疑疑卓立讞獄多所平反逾年卒于京師人咸惜之

楊國正字珍山長泰人封御史塚之十四孫也性至孝父以非罪繫郡獄郡距所居七十餘里餽問乏介從兄善長代之餽中途爲仇所害國正乃與母匍行納橐餽月三至訴于郡守獲宥迨父歿爲蒙師以資母養康熙戊午海寇陷城母遇賊于巷賊刃下國正以身翼之哀籲乃免俄聞從弟被賊擄躡其後突入賊宮觸酋怒將殺之呼曰天乎吾尋從弟而自隕其軀奈母何賊憐之與弟俱釋比食廩名益顯泣謂母曰從兄爲吾父亡于仇叔父老且貧無以贍家胥兒責也卽爲叔父立嗣代叔父有孫授室分產一如己子營葬五代墳建始祖廟皆孝心所推也以選貢銓教職年七十八終子曰煥

日煥字東暘力學好古尤湛河洛之旨爲掌教禁浮僞崇真實邑令每下車慕其學行必造家敦請遊其門者率

蒸蒸鼓舞年踰艾逮事父母授徒講課少暇輒趣漆下
爲孺子慕與幼弟分產自受硯瘠者處友朋夷險弗競
人望歸之乾隆癸酉拔貢成均兩世學博數奇僉謂屈
久必大伸長子新基今登甲子科舉人任四川納谿知
縣

陳杓字仲衡漳浦蓬山人性情敏沉靜讀書寓目成誦學
古文辭既成體藏之篋衍不輕示人銓部林紹祖見之
心喜遂妻以女自是沉浸經史所造愈深年十二遊庠
旋食餼登鄉薦乾隆元年成進士人謂必入館諸先達
樂爲汲引杓退然恥于謁遂南歸益講求爲明體達用

之學于吏治民瘼靡不究宣平居尊祖敬宗定祭儀置
祀田至于葬救賙賓具有古人遺意鄉有公事不避難
慮事必濟與人交重然議而襟次悠然花晨月夕良平
素交杯酒論文相好箕間行已端嚴未嘗以片刺干有
司至于桑梓利病則侃侃直陳不爲囁嚅之態邑令長
庚匾其堂曰邑慕典型蓋實紀云

劉鼎鉉字躬振長泰人祖應奎天啟辛酉舉人任晉江教
諭好古著歷代史綜父毓獬邑增生鼎鉉生而遭亂多
艱虞嫡母亡生母又亡事繼母庶母如母父席世資家
中落鼎鉉質貸日餽甘旨時采山漁水進鮮物以爲娛

不欲又知其拮据之難也父歿辛苦舖諸幼弟娶沈孺人入室鼎鏹年已近四十矣孺人工女事于是以餘田畀仲叔二弟使耕餬其口而自携幼弟遷郡城用資孺人縫紉以所獲錢易薪米如是者數年而仲弟亡已乃爲叔弟季弟娶婦季弟又亡復爲之立繼葬自身已上五世祖妣之柩五又葬旁親及姑姊適人無主者凡數柩其葬生母也形家曰吉女兄請以父柩合葬鼎鏹曰有君母之殯在乃爲父卜吉而以君母附其動必依于禮如此卒年六十有二子登芳孫三人希周甲戌進士任邳江令希孟壬申舉人

康天墀字步丹龍溪人祖孟侯順治辛丑進士官終羅平州牧有惠政父卓然由歲貢歷教諭終京衛武學教授好培士類天墀繼之性謙謹卽童稚亦與爲揖讓弗敢倨貢于成均乾隆丙辰出北闈聞其師戴侯焯歿趨哭爲經紀後事爲位館中朝夕奠聲嗚嗚然振邸舍不自知其哀之過也登辛丑科授泰寧教諭除福寧教授晨輒躬詣大成殿焚香灑掃丁祭備物必蠲潔盡誠浚泮池改建五王祠率捐俸以倡課多士講論文藝終日不倦卒于官天墀心厚于仁偶見暴骸則以衣衿裹而瘞之九上長安于所瘞處悉躬赴封植不以委人人尤

以爲難 族人偉然字臞仙以恩貢授羅源教諭除興
化教授首揭朱子白鹿洞規條以誘進諸生娓娓不倦
年老告歸卒于家遺命不用浮屠學者稱中江先生
江觀字賓之其先海澄人也父文煥性行篤實以醫術濟
人所得錢遇貧病者輒周焉或勸置產曰吾田在心將
留爲子孫耕耳觀生而天質醇懿端重若成人稍長讀
書卽有志於聖賢之學嘗自題齋壁曰通天地人之謂
儒其自命如此爲諸生時文名藉甚屢困棘圍人或爲
扼腕而觀讀書自得不咎有司也乾隆癸酉以五經登
鄉榜甲戌成進士翩然南歸益潛研古人道德之旨郡

守貴陽蔣公採輿望延爲丹霞山長教人立身行己立
歸于正勤工課比家塾教授尤諄諄焉漳士遊其門者
皆有所成就至性過人晨夕瞻戀庭幃依依若孺子脩
脯所入以資奉養及弟妹婚嫁之費有異母弟放浪虧
負親朋財物觀默袖金代還一至再其弟卒感悟爲善
乙酉觀赴部選途中得病至邸知交爭迎問從容叙其
家鄉情緒相慰藉俄頃脫然而逝士大夫皆痛惜相語
曰吾鄉少一善人矣

詹恒字敬持長泰人九歲失恃孝于繼母父成章晚有足
疾手扶持不稍懈家貧日營甘旨爲養而饗殮常不給

性清介不苟取不妄交與黃寬交稱合志以節概相尚而和氣可挹友人臨沒以孤子托爲之教督有立妻之兄弟寧甚時周恤衣食且竭力完其婚娶乾隆庚午舉于鄉年六十五卒一室蕭然惟卷籍疊盈箱案而已好古文詞尤嫻吟咏聲調清越著有四香堂詩稿

王新捷長泰人附貢生性敦厚好施值歲暮必分升斗以周當厄者大稔空其困若貸若賑不足則以餘貲繼之有林某者積逋賬累累鬻其子稍償所借新捷驟聞之驚出涕亟還之令贖回後某僅以此子延一綫之祀男起玉邑諸生能繼父志鄉人有爭訟者釋以片言精于醫有請必赴貧者并予之藥課子孫以文學兼習醫業所救命甚衆人謂王氏世有隱德云

曾世英平和人性孝友兄弟五人世英行三父嘗思蜜棗世英一晝夜到雲霄往來三百餘里以進居喪讀禮三年無見齒兄弟相繼歿門以內孤寡纍纍皆世英一人撫養成立行于路遇險阻輒剗平烏石山有斷腸草常害人冬取火焚滅之以絕根株其平生篤行稱是

汪洋字次成詔安人少孤事母母病祝天願以身代母歿哀毀骨立衰椎百結未嘗一進房幃旣葬廬于墓後改葬仍哭奠哀聲不忍聞事師林維章如事父師歿撫其

孤孫如子有坊客寄白金五十兩歲久不來訪求其子還之有司薦舉賢良方正以明經選松溪訓導未任卒于家

論曰胡然徐登甲莊士元諸人履素抱醇不為蘄絕之行平居恂恂若無以異于人者然處則為質直好義之儒出則為悃悃無華之吏視虛夸眩耀外若可觀而中不可測孰優孰細必有辨之者矣諺曰桃李不言下自成蹊其篤行君子之謂歟

李耀宗

王耀文

李一龍

陳永得

林員明

孫淵光

廷楷

沈榮爵

熙陽

林域

編

許良彬

黃士磊

震陽

葉逢春

蓮

封侯

晁章

顯

泉章

陳良計

郭居鼎

游道政

陳會

沈東陽

林源渭

林仲選

李耀宗龍溪福河人家豐于財順治壬辰海寇困漳郡凡六月闔城餓死幾盡

王師既至圍解耀宗乃傾家財募僧聞曉收遺骨得七十三萬作五大墳瘞之南關外建萬善寺布政周亮工義之為立碑大書其事乃旌之日一郡善士而耀宗家遂

貧

同其事者有王耀門李一龍陳永得林員明四人

孫淵光字陸陶詔安人年十六補弟子員爲人貌寬和而有智畧外舅乏嗣有螟蛉子不之愛令別居以家業托淵光外舅歿淵光召其子悉還之康熙甲辰間遷民內地避寇歲凶無所得食有健卒掠買難民婦女數十驅以扎淵光聞哭聲憐之度武人不可勸以義乃募諸悍少年告之故且激之曰若素所豪皆暴橫能解此厄真丈夫耳諸少年皆曰諾雞初鳴伏外郊伺健卒過爭挺擊之健卒鼠竄亡命乃謂諸婦女曰若毋怖吾非賊也承孫君意耳汝急逸去世少有知者淵光之老也爲壽寧訓導能其職後丁艱抵家養益遠鄉人慕焉子廷楷

字幼裴年十六亦補弟子員己丑成進士任雲和令民戴其德三分校鄉閭所拔知名士金狀元姓其一也初下車時雲和民不知向學公餘親爲指授文風遂振以母老告歸侍養閉戶守恬不輕投一刺所得祿糈分給族戚無吝容其輕財嗜義有父風

沈榮爵字伯脩南靖諸生順治壬辰乙未間海寇張甚山寇亦竊發西溪道梗帥弗能靖榮爵主鄉約與父老訂爲聯絡之法三家出一壯丁十丁一隊隊一伙兵無事則耕有事則戰一鄉遇盜則諸鄉要其歸路鄉有爲寇謀者聽父兄舉首則擒而沉之水一時巨盜戴鵬吳亨

等俱殲焉西溪安堵丁巳白頭賊擾漳制府姚啟聖檄再主鄉約鮮有犯者遠近避亂者多依之兄子熙陽亦縣諸生學歷法曉奇門榮爵保護鄉閭左右之者熙陽也

林域字肇方龍溪人好行善事嘗築石路修南門新橋以便行人雍正丙午漳大飢捐米賑急窮乏復置義塚二所鄉人德之遵例任刑部員外郎遷戶部郎中監寶泉局告歸卒孫編字受一克繩祖武郡邑諸興築巨役悉獨肩其任而文雅詞翰尤爲士林所許可亦以例授員外郎銜未任卒于家

許良彬字質卿海澄人少誠實與人無競長從族父提督正于軍門因究心韜略對知交慷慨談謂大丈夫當策名清時圖形麟閣上卽不然亦當乘宗慤長風破浪萬里安能鬱鬱老字下哉居無何正將遣人適外國而諸子憚行良彬請往由是海中島澳風潮夷險順逆皆瞭然賈粵東與南洋人互市而約期而歸貨直過三期則否不爲負洋人與良彬貿易成賈而返會其國有變逾五載乃來良彬悉封識其直計數以償且予息商人歸告其酋酋曰能若是乎令諸夷悉赴良彬商遂雄于財當是時臺灣餘孽潛逸內地提軍姚堂廉其才聘爲總

統緝獲奸人鍾朝等因疏薦之藍廷珍繼任加器重適
入 覲卽奏列良彬熟悉海疆信孚異域可大用朱相
國軾蔡宗伯世遠復共推轂引 見

上悅其材以知州需次改叅將不五年竟代廷珍帥廈門良
彬正已率屬輯和軍民在職十年未嘗以喜怒行黜陟
卒于官賜諡壯毅初良彬族屢屢受侮于隣右巨姓良
彬旣貴族人修舊怨焉適過里門隣右訢之遽自往謝
一族皆譁良彬曰君子不欲多上人恃貴以凌貴可久
乎吾懼弗堪也乃俱愧服良彬無軍功驟躡大位鄉黨
罔或忮者以謙恭故也子師義亦以謹飭和厚稱

黃士磊龍溪人明季寇亂築堡石鼓山以衛鄉人海寇劉
黑龍來犯士磊率鄉勇殲其徒黨嗣後賊望其堡輒氣
奪順治十二年捐豆四百石助餉當道欲官之辭不就
子震陽孝事繼母從仇滄柱學購書數千卷載以歸不
求利祿篤志修行鄉里化之

葉逢春字心一海澄三都人隱德實好孚里黨海寇起相
戒勿擾其鄉寇擄人徵餉稍拂意輒殺之嘗有二十四
人漁于海爲寇所擄詰知爲心一鄉人遣二人挈舟還
畱餘人爲質曰能延心一來則俱免若輩二人告急或
危之曰茲行恐不測心一慨然曰吾一行而全二十四

人卽不測亦宜往徑赴賊舟其酋盛服倚舫而近曰受德久不酬欲藉此一會耳初心一嘗餞客於嵩與遙見一丈夫當筵立遣人邀之飲極懽而去卽會也會厚出金帛心一概不受以二十四人還子蓮字昇玉一字實園凡所爲必求慊於心隣鄉江氏女甫十歲掠于軍蓮遇之女牽其裾而泣旬金贖以歸女德之終身爲服碁賈於粵東羊城同舍販海得重貲病不起爲籍所有固藏之親屬至出其私記與籍合人服其不欺子封侯字桐友弱冠爲諸生善承實園之志兄弟不忍分箸建宗祠置祀田志切濟人嘗築一小樓昏曉登之見有不舉

火者餽之米因顏曰望烟樓方就昏澄邑時遇颶風覆他舟冒險以救雖後昏期不顧也中歲遊金陵遇呂氏子於茶肆幼被擄尚能記憶里居乃隣邑同安人也攜以歸復助之娶婦治家有法子弟自少至老無博塞及出入公門之過好讀書不離手積書至二萬餘卷嘗訓子孫曰吾先世植德當有興者果以子廷推貴 贈文林郎子六人能世其家長曰晃章次曰顒曰杲章晃章字又韓少事咕嗶刻厲殊常因客游父友肆中爲所器目任以事嘗檢焚故紙得遺金不以私益倚仗之已驕颿風渡日本貿易日本俗以好女挑客蠹耗其金客多

墜術中晃章方妙年輒戒絕惟買名卉數十本載以歸植池館爲父娛父建祠置田盡傾所贏金成其志以子文馥貴 贈中書舍人顯字嗣沐少負才資好文術游湖海爲賢士大夫推重南靖莊復齋亨陽北平黃玉圃叔璫俱以名德爲監司淮楊相見握手甚歡性慈愛女兄適辛氏寡爲立嗣授室又寡復嗣焉兩世相依不忍離居吳中有相識爲官將罷去夜叩門曰盡今夕貸我金四百則官可無罷老母妻子可獲全亟借貸如數予之耕牛病家人以市于人嘆曰壯用其力老則棄之吾弗忍也令贖還景章字紹期造橋建亭便行人來往海中

中有圭嶽貧人日拾螺蛤爲生鄉豪籠爲已物景章邀衆聞之官判歸公遠近咸資其利自心一至晃章兄弟皇皇爲善凡四世如一身可謂善繼

陳良計字智字平和人居大峯山之麓不求仕進以好施聞於州里鄉有旱田數百頃衆謀築陂興水利良計自割腴田予衆開渠濬畎資灌溉國初遷移流民載道良計捐資不少靳有董姓士人攜眷求資如數予之踉蹌去忽遺失合家悲泣欲投厓同行者止之勸再求良計士人慚不能前同行者強之曰陳公善人也吾與若偕往旣至道故良計復如數予之無吝色士人感歎而去時

值兵荒死者相枕籍施棺塋埋歲以百計縣官嘉其德以禮賓之鄉人莫敢齒

郭居鼎字彞侯海澄人幼失父母遭亂與兄居昌相失跋涉追尋遇諸顛挈其眷以歸分產共之至老怡怡不少哀嘗周覽海濱見海岍橫決十數里淹田廬惻然者久之因捐資修築邑東五都有渡口浮雲宮爲舟子者皆豪暴健卒妄需索行人少不如意則凌轢隨之邑令陳世儀聞之乘婦人輿攜小僕以往果爲所虐執而愬其帥治如法居鼎告其兄曰害去矣人未便也相與置舟二互來往復割腴田以贍篙師爲久長計漳郡新橋地

謀修築僉曰必郭彞侯居鼎亦不讓或語兩旁乏石闌遂翼之如其橋之長鼎雄于財思爲德于鄉雖以貲爲郎好儒術都人士交口稱其賢子元龍字乾父好義有父風

游道政平和清寧里人生平樂善好施族有不能婚葬者助之無吝色推之故知亦然有謝族逋賦累累追比甚艱道政爲代納復爲之均敘戶籍先後完課歲有定規謝族自是免逋賦之苦里有亡賴者非意相侵侮笑而遣之不與爭人服其量生五子課督力學皆有聞

陳會詔安人性孝友好施子守仁亦體父志詔安南通百

澤州府志 卷之三十三
粵海潮與溪流相入人苦病涉守仁倡遠近居民捐金鳩工代石爲橋同事者見費多輒引去守仁出私橐成之雍正五年歲大飢斗米價值數百守仁勸分出贏三閱月里無餓孍嘗陰雨獨行聞鬼哭聲見古塚壘壘多傾陷惻然築土封之人推隱德云

沈東陽詔安三都人性喜救災當丁未大飢疾氣盛行買棺收骸如弗及同時有林源渭者作粥置衢路與餓者食之百千蜂聚勢不能給渭源鬻田繼之仍不足假貸以禿之又不足乃謀飲助計施粥六十日活人不可勝計襄其事者林中選與有力焉皆一邑之義民也

論曰世謂行義之士其流爲俠非也俠以義鎮人不
必皆合於義義行之士則見義而動緩急足賴者也
唐韓愈稱孔戡嗜義如慾遇祿利則退怯如懦夫然
若李擢宗孫淵光諸人近之矣

九翰林合傳

國朝漳進士入詞館者首唐宗丞朝彞別有傳繼宗丞入
詞館者曰葉先登繼先登入詞館者曰吳一蜚繼一蜚
八詞館者曰蔡文勤世遠自有傳繼文勤入詞館者曰
蔡衍誥繼衍誥入詞館者曰李實蕡繼實蕡入詞館者
曰張先躋繼先躋入詞館者曰賴翰顒繼翰顒入詞館

者今尚書蔡新繼尚書入詞館者曰蔡雲從繼雲從入詞館者曰蔡澐繼澐入詞館者曰莊元

葉先登字岸伯長泰人順治壬辰成進士改庶常授翰林院檢討當是時天下初定選詞臣有才望者出為監司先登名在選中擢西涼道轉冀南道備兵兼掌軍政考成有偏裨為撫軍所啣授意注下下考先登不從因他故左遷青州通判專司捕務先登多所糾發奸宄遠跡人稱曰青天三載解官歸先登少警敏長博極羣書至老好學不倦居鄉待族黨有恩邑人于今猶稱之卒年九十

吳一蜚字漢章亦長泰人康熙壬戌進士小小即岸然自負銳志向學

國初民避寇居深山間里少年率搃兵伏習擊刺以為能一蜚獨挾冊逐樹陰踞石磴諷誦聲琅琅有從而珊笑之者自若也補弟子員自登鄉科成進士選庶常僅十有七月人以為榮既授職編修告歸養母與昆弟承歡親側如孺子初一蜚父瑄嘗為軍帥治書幕中適逮繫賊黨多株連力為解脫保全銅山陸鰲二砦良民人皆知其後必昌也已而果然

蔡衍誥字紫泥漳浦人康熙乙未進士第二人選翰林院

庶吉士衍誥之生也有異質志遠大不屑屑問家人產
精熟五經躬自詮註讀史鑑于歷代興廢因革得失反
覆究考登第後自清晨至日晡夜半皆有課坐卧不離
一榻中弱冠喪母事父孝謹虎兒弟友恭既入翰林父
遣家人攜眷入邸比至已得疾逾月泣然曰吾不及見
吾父矣竟不起名公卿暨同鄉戚友莫不悲其賁志且
重為邦家人才惜也卒年僅三十

李實蕡字桃仲弱冠登科再赴禮部試成進士雍正丁未
也時館選閣部大臣得各舉所知有欲為之延譽者實
蕡唯唯辭謝既而

朝考官庶常散館受職檢書文音標望一時用薦需次御
史聞親疾即假歸十餘年後始入都予休致歸杜門不
出同年單德謨觀察汀漳浹肯實蕡未嘗投一刺適行
部漳浦造廬過訪乃得見辛酉歲歛率族人平糶天性
敦厚與人交謙恭善下尤好按引後進談道論文娓娓
然終日不倦晚喜吟咏耽古文辭自謂得眉山之勝年
五十八卒于家方實蕡之歸也鄰右豪富出媢語相詆
謔聞者為不平實蕡曰吾能堪之諸君胡為忿忿哉人
以此服其量

張先躋字愧日雍正庚戌成進士選庶常歸侍養家居二

十年性恬和無城府有犯者輒不校鄉人稱醇德焉八
歲失所怙母寡孀苦特甚故登第逾年卽請急旋里人
都未散館又念母告歸同館爭貽書敦趣先躋輒以母
老辭年近七十而歿竟先太夫人終焉以爲恨

賴翰顯字孚仲雍正壬子舉人聯登癸丑進士選庶常散
館授編修將假歸同館重其才挽留之翰顯曰堂上二
親俱篤老南望輒怛怛心不安也請假歸五年而父歿
旣塋母趣入都乃行未幾休致歸閱歲而母歿兩遭大
故皆在親側無悔人稱天祐焉家居萬山中罕與當道
通往來善接引後生詔安書院新成有司隆禮致士

聞風靡至肄業至百餘人卒年六十九

蔡雲從字亦飛生而聰穎異常兒侍從父宗伯世遠于家
塾年最少宗伯教子弟勤于雲從督之尤嚴稔其才之
美可激勵以有成也方九歲已能屬文羈貫成童通六
經左國史漢八大家家雖貧而豪邁自喜讀書山寺做
衣枵腹遊泉石間歌聲朗朗振林麓爲制義刻意抽思
詩賦古文靡不悉心體究父孚遠北試京兆卒雲從聞
訃哀毀三年骨立乾隆丙辰舉鄉科第一壬戌成進士
選庶常聞母病乞歸萬里趨程僅得視含殮自爲行狀
曰父訓承伯叔之書母命傳家人之口可痛也里居集

闔族子弟會文廟中約束鄉里禁博簞生平至性過人篤倫理重然諾自其少時伶仃孤苦詎侮內訌而處之恬然益刻勵滌除豪習一出於正遇事剛果有古人風而意思深長氣宇沉毅衆皆望其大有用于世也服闋入都比閏歲竟遭危疾卒年三十九聞其訃無不悼惜者

蔡淮字視侯六歲喪父甫就學卽知發憤舉動如成人不妄言笑讀書之外劬勞作苦母太夫人寡窶艱親抱甕灌蔬淮同其弟今大司馬新昇所汲水從母氏後或歷園圃種薯蕷收荳菘冬行林麓拾隕蔞枯枝以爲薪弱冠爲蒙館師母慮其荒落刻苦自奮乾隆壬戌進士選翰林院庶吉士時弟入直

上

書房謀迎養母憚北方寒冽弗果行乃請歸侍奉凡十八

年未嘗離左右俾弟壹意供職母懷將母憂也丁內艱盡哀禮旣免喪再越月得疾卒年六十四

莊元字步沂以拔貢生入都受知于合河孫文定家淦考入太學名第一宗伯蔡世遠延教子弟雍正壬子舉京兆試任龍巖學官諸生某以袒誣被逮州牧不察將加刑持柬請元元至正色曰士不率教當予夏楚用柎楊是與編民齒何以勵士節州牧不悅元持之益堅事獲

已後補惠安改調鳳山殫心于所職士氣蒸蒸晚上公
車成進士選庶常物望歸然朝端方擬其大杼宿抱未
授職得疾卒于京師

論曰翰林于古為左右史之官職近而地親簪筆稱
侍從歷唐宋掌校秘書草制誥備顧問至有明永樂
間遂擇其端雅明慎者入內閣贊機務自時厥後碩
輔元臣多出其中品秩班資可謂華貴矣然居是選
者當如虞永興之詞翰而忠直居裏陸吳郡之文章
而貞亮著節方稱是職若元白常揚乃其次也今

天子稽古右文修四庫書曠古典籍于斯極盛冊府縹緲以

大學士領之翰詹亦與焉嘉許詞臣得入清禁讀未
見書海內搢觚挾冊之士聞之莫不色飛眉舞漳為

材藪因考

國朝後先入詞館者合為一傳俾都人士有興焉

林廷耀

鹽

嘉賓

詹明章 鄭芳

蔡登淵

孫 芷

陳名驕

黃 補 鄭誠中

林錫齡

張淑元

葉茂遠

嚴光遠 郭成郭

姚作楫

林長汪

林瑩光

陸鍾宏 王秀榮

有嘉

李離明

林廷擢字元功長泰人稟奇姿善思銳入洞達幾微動法

百八年二十補博士弟子員時明季文風靡漫士競以險僻怪誕爲高廷擢愀然曰文魁也國家大劫至矣欲棄科舉業祖父不之許同儕有相訾警者謂娶不恤其緯而憂宗周之隕乎丙戌

上師入仙霞關八閩底定當是時祖與父母俱髮緜緜然白廷擢日與諸昆侍膝下足跡不至市閭者殆四十年康熙初耿鄭煽亂廷擢率族衆鳩四隣結堡牛山爲部署申約束課耕種一方賴以稍寧廷擢旣無意功名或勸以當風雲之會宜亟自表見咲不答惟兀兀日以著述爲事輯易書春秋周禮四書疏暨明史綱目地理新解

凡百餘卷思欲闡造化之精析古今治亂之要審吾身進退存亡之幾使其書流傳不至殘缺有識者爲之討論未知所洗與古人何如也仲子曰敬康熙己卯副榜有孝行其季曰^{字子敬}亦湛深經術才思敏妙能詩文康熙辛卯舉于鄉上公車不第恬如也^{字子敬}季子曰嘉賓性深^{字子敬}讀書見古人忠孝事輒泫泫淚下躬理家政食指繁不忍析箸待寡嫂孤姪有恩雖以諸生終人咸謂能世其家學云

詹明章字莪士海澄人隱居自樂不求聞達嘗客遊燕趙齊楚秦晉交廣滇黔所至偶與賢士大夫交或時爲當

事畫弭亂平邊之策足跡屢遷若藉以晦其肥遯之迹者晚歲始還漳州結廬適張清恪伯行撫閩聘為山長輯修先儒書魏荔彤守漳郡親式其閭為築景雲樓月餽以粟明章雖自韜晦於有司交際率裁諸義禮不固拒峻卻以鳴高康熙戊戌景雲樓傾于風雨僦居斗室中日不再食諸孫有饑色過訪者咸為嗟嘆明章殊蕭然自得也李相國光地假歸遣人道意欲見之以老病辭年九十三卒蔡宗伯世遠表其墓稱曰兼山先生兼山力學著書老而不倦尤精詣河洛之旨未嘗授徒講業而貫穿六經上下諸史以悅研事物之理不肯為無用之學又工吟咏善書法既而自謂無益輒棄去所著有易義等書凡二十餘種

鄭芳字淡之海澄人敦學行蔡宗伯世遠為翰林時家居十載常與漳上諸文士相勗為宋儒反身之學芳獨能契會博觀內考沉浸究研胸中浩浩然若有得也雍正元年

詔舉孝廉當事首以芳應薦病不能赴以死芳能文試輒屈其曹顧自弗善也嘗集朱子前後說作四書解自集註而外兼撰精義輯略雜學辨疑平問答語類諸書附以宗廟郊社明堂井田圖製參互考證以歸于一其涵泳本文運衆說而出之尤簡直有體名曰畏義

學者便之芳以名在遠近爭延爲師講受諸生皆本心
得以啟發故多所造就云

採二希
堂文集

蔡登淵字潛夫龍溪人爲人勤苦刻勵兀坐矮屋中孜孜
焉惟日不足也師事詹明章康熙丁亥張清恪伯行聘
明章輯儒先書潛夫與焉會伯行移撫江蘇邀之行以
父老辭歸 簡勤親王總制閩浙詢漳南積學高隱士
將禮聘登淵亦不應時與知交講論于清泉峭壁之下
蕭然自得未幾卒年六十有八登淵於書無所不窺一
以考亭爲宗愛薛氏胡氏讀書居業二錄謂獨得儒先
正脉玩味未嘗釋手嘗曰持身涉世貴確然特立夫子

繫易乾初九曰不可拔有味哉顏其居曰確齋學者因
稱爲確齋先生著有家禮輯略祭禮儀節及自訂經學
性理書藏于家

孫芷字芳洲龍溪人至性敦懇父客死于外芷數千里徒
步扶輿歸負郭田數畝悉推予其弟若姪獨以教授爲
生未嘗言貧居芝山歲入學租又分賑亡友妻孥久而
不倦當是時漳中爲南州之會文士九十三人並魁壘
偉奇之彥芷處其間獨恂恂焉退然如不勝衣爲文淵
淡而雋永人亦如之一時並推重顧湛滯舉子場終身
不遇晚以貢次選授同安訓導雍正庚戌辛亥間故相

海州府志 卷之三十三
國趙國麟巡撫閩中加意作興人士芷以名宿聘主鰲峰書院造就益宏芷爲文賸坐半頃舉筆疾書無所更攔著有仰山文集初應童子試冒汪姓故今學士稱者猶曰汪芷云

陳名驕字漢醇龍溪人也髫年失怙恃矢志攻苦力行孝弟顏所著述曰念我不忘本也見人退然若不勝衣訥訥不出口而撝謙善下人服其德至於經史子集細意剖晰得其蘊奧學者尤傾慕焉從之遊者後先登科第驕在庠序中兩冠軍鄉闈三被薦終不獲遇康熙庚子始中副榜迨選易州判命下而驕已卒

黃補字裁之龍溪人力行好學早歲究心四書五經及濂洛關閩書嘗謂學者欲識孔孟之心在體程朱之言故其學以主敬存誠爲宗終日欽膝危坐達旦抵暮無惰容嘗陟武彞造建陽訪朱子遺蹟欣然歸著有心圖太極圖原西銘口義等書藏于家補少時以書謁安溪相國光地相國嘉其篤志又從同里詹明章問質疑義所學卓有淵源晚益邃養結虛壘及山之下雖日不再舉火而彈琴咏歌與古賢晤對玄然自得卒年八十餘鄭誠中字葦齋龍溪人大同守潤中之弟也潤中爲良二千石誠中名家華胄而閉戶靜修罕與豪貴人來往內

行純潔尤以文鳴于鄉結社南洲與鄭亦鄒戴盼孫芷
諸名流服襄驟駕狎主齊盟顧獨浮湛諸生間康熙已
酉應鄉貢未仕卒子蒲乾隆甲戌進士

林錫齡字于九漳浦人家貧授徒以贍朝夕少失母依父
膝下無或離一日應郡試忽心動謂同儕曰吾父得母
疾而念我乎急歸省果瘋疾大發館粵東講書至父母
在不遠遊沉痛切至淚泫泫下環聽者皆感動自是百
里外有延聘者率弗赴每病俗士究心膚末矜浮藻有
志經學者又傳會穿鑿義益晦乃悉心體會傳註講章
之外時抒獨見而精微之旨動與真儒相契合生平質

直無偽斂然靜默體恭而氣和爲文章自寫心得未嘗
求工試輒完其曹不自意入舉場踴躍至白首無愠色
教弟子先倫行終日溫溫有過必莊色相規不少寬假
年逾耆始以貢次司訓侯官益勤課講年八十餘致仕
猶日召舊從游及諸孫披篋論經定疊疊焉雖微疾不
稍輟先是漳浦令陳汝咸雅重錫齡時諮問政事有欲
因以干請者颯然曰子誠不意子以此等人目予有司
舉孝廉以父老辭然人皆謂是真孝廉云嘗以矩名其
園漳人士共稱之曰矩園先生所著書九六種其四書
解行于世

張叔元字質人海澄人幼穎慧日記經史萬餘言父母慮其聰明太露納之空室中僅有萬年歷一卷叔元遍閱之經年不用日書既爲諸生食餽拔貢太學廷試歸文名籍甚授經外躬親孝養足迹不出戶庭與人處冲冲然善下不知其爲知名士也雍正元年當路舉孝廉方正固辭郡太守許國祚延主仰文書院十邑才俊多所成就年七十餘卒

葉茂遠字聞遠龍溪人康熙辛卯舉人性好古研索諸經解抄錄巾箱以資攷証嘗私訂儀禮經傳謂禮記傳也今人讀記而不讀儀禮經失其原始矣韓子苦難讀而惜不輯讓進退于其間乃景仰文周法制之至者不謂王安石藉口廢黜之是得罪於韓公也一時遊其門者皆知崇經學樹品節晚授古田縣教諭教人讀經又貴敦本厲行以發揮經蘊其本末兼舉如此諸生顏其堂曰力興正學載古田名宦志在官十年以老告歸所手定書目頗多雜心堂文集乃其自著也居於西北二水之涯學者稱二涯先生

嚴光遠字四被海澄人工制義少與同產兄與智齊名兄歿獨養母益孝謹授經不百里外雍正乙卯舉于鄉一上公車以母老遂不赴掌教儒山書院士之有文學者

多出其門年七十餘終子錫祉亦爲名諸生膺歲薦
郭成郭字若虞幼嗜學工制舉業兼治古文詞原本經史
尤服膺朱子大全諸文家最愛歸震川集手丹黃至四
五次故所作皆精邃淳古時流莫能及也鄭亦鄒倡主
南洲社偉其學表以風社中入南靖學試輒高等與莊
副使亨陽齊名成郭晚始舉于鄉公車歸遂不復出家
故貧所居不蔽風雨常杜門著述浩歌自得也里中求
文者非其人雖厚幣悉辭之老益潛心理學常語人口
學以不欺爲本曾子誠意子思慎獨以及周程張朱之
奧皆托此一言因榜其所居爲不欺室卒時年七十餘

姚作楫字濟夫龍溪人以方行稱少失怙恃悲不逮養事
叔父甚恭謹曰與吾親同體者也家貧饔飧不繼或有
所得棖肉必以頒其親從之老孤與寡者曰吾非能惠
所以勸也嘗授徒某家隣有艷婦來奔峻拒之詰朝請
徙館主人怪問終不言其故濟夫性敏以勤晝夜讀誦
不輟然數句試輒不偶又善病年五十遂鍵戶專務著
述泊然無名利營當是時里中士競尚詞藻割腴摘豔
自詡屈宋揚馬獨作楫與郭成郭論說程朱兼治韓歐
言證道敷文一歸實行纂有漳儒文薈四卷嘗採六經
二十一史分君臣父子諸目爲倫鑑五卷選十二代詩

分典觀羣怨諸類爲詩綱七卷又以李幼武續宋名臣言行錄猶缺理宗以下因輯宋名臣言行錄續補四卷尚未成書惟文蒼有稿本行世郭序之卒年七十一

林長汪字百度漳浦人歲貢生少穎敏好學時宗伯蔡文勤公以正學倡導人士語人曰林子嚶嚶殆聖門之狂士歟長汪聞之益自厲教授生徒自四子書諸經以及左氏傳論議精微奧衍莫測涯涘每日攜一編逐樹陰繞清流踞石而坐弟子環列其旁反覆開說娓娓無倦容有質疑者必竭兩端如撞鐘隨叩而響也閑步庭除聽弟子誦讀聲抑揚頓挫必從窓櫺外朗吟密味以和之高下短長之間窾卻條理不言而喻旬日歸省母年九旬矣躬詣市上購求山海之鮮小孫負囊米踵其後或謂先生宜崇體貌長汪應之曰吾固人子也豈爲子供親甘旨而崇體貌乎授閩縣司訓丁憂服闋又授霞浦卒年七十有八著有四書摘要

林瑩光字韜仲漳浦人從蔡文勤世遠講學鰲峰不牽於習俗文勤喟然曰林生信道甚篤言動可師延主家塾遺以書曰諸子資性可造端所向樹根底嚴課程惟賢師是望諸子後先登科第有聞於時今大司馬新歸養復延請課子孫於也爲作疆恕先生傳曰先生性

孝友既母事母蔡孺人如孺子假館歸必懷鮮菓以獻時或嬉戲前母笑曰而效老萊子耶授子弟經訖不欲煩以訓詁先生顧不自逸講論聲朗朗不倦回億四十年前侍舉比掀髯奮臂商古今人物得失精神如昨日事益嘆先生完養爲不可及也卒年八十著有四傳提要經學通考若干卷

陸鍾宏字祈宇海澄人雍正己酉選拔入成均是時合河孫文定家淦爲大司成以五經性理近思錄書訓諸生朔望升明倫堂講業者環坐聽講講罷相與剖析疑義難藹若家人祈宇於言下獨能領受文定心器之蔡文

勒世遠嘗語人曰祈宇於學有會心山左饑以高第生街

命往辨賑事旋以親老假歸乾隆甲子舉於鄉設絳郡城戶外履蒞爲人簡默篤本行動止不苟著有四書說及詩文集若干卷

王秀榮字乃欣龍溪人肌骸成削雙眸耿耿射人鄉先正葉茂遠海濱耆宿也秀榮從之遊漸有所窺探督學上蔡程元章取入邑庠居恆好書集數萬卷雨淋蠹蝕之餘隨部檢抄得其涯涘而於儒先註疏及通志堂經解安溪李氏說各有紬繹手自抄錄心希心得或勸之著

述曰吾心契在胸將以驗諸所造可浪費筆墨耶課子以先儒程氏分年日程爲準子有喜有嘉字隨孚以五經中副榜入太學及河間王仲退門王故李文貞高第深思詣極學成行尊有嘉自執經後嚴義利之辨爲人爲已之分旬日間每進見輒濯去舊習不屑屑爲記問詞章之學雷副憲鉉李侍御玉鳴蔡大司馬新皆心重焉自京師歸侍雙親承色笑接引後學無倦色館于鄴山與黃與亭寬晨夕倡和交勗聞王仲退訃爲服心喪三年其篤於師友如此乾隆己卯舉於鄉未上公車卒所著有鑿山詩集及駢體古文若干卷

李離明字麗文平和瑄溪人父懷春廩于庠離明繼之稱高等生鄉之耆俊皆折行輩願交離明退讓溫如也好湛思六經宋儒書爲科舉文宏深肅括房考官屢薦不得售無少芥蒂與學子講晰經書疑義諄復不厭同安黃文川濤龍溪黃巽亭寬二君以名輩掌文圃鄴山書院皆先後舉離明代主講席從之遊者甚盛辛卯膺歲貢乙未冬卒年六十有五著有古今文詩詞若干卷

論曰唐韓愈自言世無孔子不當在弟子列乃觀其與殷侗博士書推讓弗如嘆其能味於衆人之所不味至欲執經座下何其言之相戾也六經者載道之

書含咀英華作為文章可以雄視百代而離絕乎句
讀反覆乎義疏首尾貫徹本末洞哲則雖昌黎亦有
所不逮焉此其所以出見真儒蹶蹶然顏變愧生也
今錄林廷擢詹明章已下諸儒所造淺深不同而同
歸於潛心下帷耽經好古彷彿漢唐儒先雅範更援
引昌黎推崇經術盛心以見先正自知之明後之號
為文士所當孜孜致力者在此不在彼

李基益 鄭亦鄒

溥 陳箴 戴冠

呂雲棟

許錫祉

鄭子江 陳珩 袁庭

田 林夢斗 王道 李松齡 李杜

魏銍 蔡 叻 廖 進

字基益字時行龍溪人世奇之子也康熙甲子舉人九歲
善屬文解聲律遂以詩鳴年十一廁干庠困省闈者十
困公車者三因詣部乞改教職之任未定久之同學有
歌續招隱者報以言歸曲即日詣上官乞休既抵家日
以著述為事基益口訥然每談時事輒慷慨論列不能
已嘗鏡古今得失傷時事盛衰作史論感鄉俗之偷憂
民生之感作閩漳風詩思微言將絕念末學頹頹作心
宗其餘喜怒哀樂悉寄之詩末年為邑令聘主義學歲
餘以老病辭年七十七卒

鄭亦鄒字居仲海澄人父之惠舉順治丁酉經魁知山東
任邱將知縣致仕歸以齒德重於時所居鄉曲直就平
無庭訟者嘗論除里長甲戶之弊至今民德之亦鄒幼
而穎敏爲父所鍾愛十歲能詩文十三補弟子員旋食
餼試輒高等顧不屑屑帖括業博覽群書務求實得子
史百家皆丹鉛數過聞寧都魏叔子善古文爲海內耆
儒齋糧往謁之遂浮江淮歷豫晉下楚粵歸而鍵戶著
述蒐輯舊聞欲勒成一家言以不朽自命當是時亦鄒
向爲諸生名已滿大江南比比膺鄉舉第丙戌進士執
興薦其才授內閣撰文中書與何肥詹焯汪武曹份吳

荆山士玉方望溪菴在都門論交甚契望溪嘗許其所
著書兼蔚宗承祚之長荆山亦稱居仲詩才史學肩唐
踵漢又言閩中同年推二鄭謂亦鄒及侯官鄭魚門在
鑰也亦鄒雅志著述澹于仕進未幾乞假歸里結廬白
雲洞之麓倡南屏文社以友四方學者自遠至適張
清恪伯行撫閩聞其名聘爲書院學正深敬重之少豪
邁負才氣與友朋辨論喜求勝及其長書院也薦耆儒
詹兼山於清恪見蔡文勤世遠折行輩爲友致書戴麥
村盼謂君有高弟莊亨陽吳開業吾門有陳先登郭成
郭及從子溥皆後來莫不倍加護惜其雅懷汪度好

善如不及也又如此康熙間張清恪薦入纂修館未赴而卒所著白麓藏書十數種皆散佚惟存樂府一卷詩文鈔若干卷從子溥

溥字百泉家石鎮弱冠受知學使沈心齋涵取邑諸生第一爲人雅飭而博學多才自經史以至方書地理靡不精究工詩及書畫甲午鄉薦癸卯第進士授泉州教授卒于官

陳箴字于寶龍溪人順治五年恩貢生歷平和邵武建寧連城教諭所至皆有聲周方伯亮工張撫軍百行先後禮重之工詩有中晚人風格著晚簾詩集晚簾文鈔第

五集藕絲集與同時洪理順齊名理順以文箴以詩吳越間推主文壇者必及兩人云

戴冠字子彈詔安歲貢生岐嶷異允兒稍解書穎悟絕倫有神童之目未弱冠補弟子員試輒冠軍遊林忠簡日瑞之門授以經史子集靡弗蒐羅淹貫耽吟咏遇古剝琳宮殘碑碣摩挲玩賞無虛日屐齒所至一時名下相酬唱題咏頗多又徧訪名山大川如百粵三江五嶺八閩諸勝輿酣落筆以意氣自豪晚得大田學博嘆曰是教育英才地也日講課諸生亶亶無倦容問字者多戶外履秩滿拂袖歸邑令秦炯重其人詢及時政適有文

量之議吏不爲奸寇與有力焉修詔安邑志名善本
呂雲棟字松甫龍溪人生有足疾盤跚行父弗善也日錙
書寸許命誦弗上口則加笞雲棟日從諸童子嬉夜五
鼓篝燈雜誦質明皆如流父奇而愛之弱寇補弟子員
屢試高等數踴省門試不售頽然詩酒間晝授生徒夜
講元要諸宿學多從質問焉雲棟研精文律覃思幻渺
當共有得刊盡陳膚猶見先秦兩漢人骨脉著有松甫
詩文集其弟子許錫祉爲人修潔亦好古文詞惜晚歲
目盲散失不存焉

鄭子江字民仲龍溪人有夙慧台學爲文卽出語驚先

父賓甫課督甚嚴無間早夜遂於書無所不讀冬則擁
鑪火朗誦達曙日盛冬尤宜讀書也得異書必事鈔錄
滿數篋好陶南邨王輞川杜少陵詩於文則上規左國
下逮韓柳諸大家與勝國名宿倡和數年盡窮詩古文
詞之妙漳人士交稱之曰吾黨力學好古惟有二鄭耳
蓋指亦鄒與子江也弱冠補諸生旋貢成均登康熙康
子賢書屢躋公車不欲赴蔡文勤世遠雅重其學移書
勸之行子江遂辨嚴取道北上中途疾作逕歸以卒子
江天植厚能以色養其親喪祭盡禮每逢諱日淚泫泫
下不能止進牲饌必歷指品味以告如事生然生平疾

惡甚力而接人必以禮性廉介雖匱乏不苟取於人有
急我者卽傾囊周之著有四書說鈐大平十五策沙村
詩稿古文存稿若干卷臨歿囑其子曰吾半生精力萃
此數書當索知我者定而行之

陳珩字非楚龍溪人少補諸生飭廉隅跬步不苟督學車
鼎晉試第一面獎之講學授徒益樹品所著制義及詩
歌古文詞不囿於俗屢困棘闈終不改甲辰冬督學黃
之雋按漳珩賁呈告病見其名慰勞之曰耳熟久矣猶
作諸生耶命屬草不用楷招覆榜出名第一鐫其文于
校士錄尤加激賞珩與同郡蔡文勤世遠友善文勤稱

珩善古文又嘗與陳夢林陳元麟論郡人士可爲巨擘
者各暗書姓名於掌出視皆同共三人其一卽珩也時
議舉鴻詞科而珩卒士論惜之

袁庭字子楚龍溪人少負奇氣博學尚文尤工詩所著舍
南集嶺南梁蕪亭爲之序多變徵之音其後從四明陳
心齋浙西沈竹溪諸公遊詩名益震著有推袁集不離
慷慨激昂本色晚著拱戟集一變而爲冲和恬適得風
人深趣漳浦蔡文勤世遠序王直夫詩云吾黨陳石林
藍玉霖陳石民陳非楚以文名者也莊元仲李麟倉袁
子楚及直夫以詩名者也就詩而言子楚長于古足爲

定評庭力行孝友稱重於鄉黨弟蚤世庭舉一子名仰南補諸生立爲弟後與世之專鶩詞華者相去逕庭所謂溫柔敦厚得詩之深者歟弟田字耕野亦以詩名性好山水顧貧且病日唯嘯歌牖下一旦興廢遂買舟南浦出黃如江登大武陟梁山而歸著初遊草陳圖南爲之序閩粵人多傳誦之時有子田腑臙皆山水痕之稱畸士也

林夢斗字子牛龍溪人美鬚髯善談論博雅能詩尤長子樂府由柳河東而上摹漢魏者也漳故有名進士曰鄭亦鄒戴盼才名震一時數有論著或商確事宜則必質

諸夢斗焉故宗伯蔡文勤世遠嘗序其詩曰夢斗咏古撫時悲壯清峭令讀者悄然以思和余都門新作名公卿皆歎詫問曰林夢斗何人則對曰吾漳林子牛也

王道字直夫漳浦人與蔡文勤世遠爲總角交相善也嫻吟咏少以詩受知于漳浦令陳汝咸及學使沈涵名大沸北遊京師吳宗伯士玉重之以薦授金山令道自諸生至筮仕每餘暇輒手一卷嘯吟不輟晚家居暇甚無事更得寫其陶然蕭散之致所爲詩從近體入雅健沉鬱古風樂府氣味淵茂意理俱足其不懈而及於古者也

李松齡字鱗蒼漳浦人性峭直爲邑諸生屢試甲其曹顯
有時譽郡守柏卿魏荔彤聘修府志復令纂風雅源流
十三卷於時中丞張伯行議刊校儒先書延九郡知名
士松齡與焉臺灣告警制府滿公視師廈門羅致賓幕
羽檄旁午屬草籌畫動中機要歲戊申 朝議行薦辟
令蔡宗伯世遠以書勸駕松齡顧以父老不忍違膝下
歡作續南咳書以見志旋膺薦鴻傳竟以無妄之事寢
薦牘人咸惜之晚入京師館故相國滿公家游太學試
皆高等雷副憲鉉時助教國子謂之曰君老成奈何與
後生輩角藝相後先乎松齡媿謝自是日與輦下諸門

人賦詩酌唱哀三百餘篇謝古梅道承愛而序之逾年
赴銓部得教授職未仕而卒著書凡十餘種惟日強堂
詩鈔鹿水門集行世

李杜字遜唐海澄人胸無城府而見義必爲雖機穽在前
弗顧也居斗室中博覽史冊于歷代升降得失興廢之
故靡不切究平居酒酣耳熱與知交劇談天下事慨然
若思大用于世及凡進士則又以家居色養爲樂而徜徉
于山水間初杜避地寓漳浦授徒講論暇輒引弟子
暗誦古今文較遍數或列長案拈題角遲速以爲樂誘
掖獎勵之中寓敬業樂羣意趣後生小子無不樂遊其

門爲文章筆無停機稿不再易見者恒爲心折而未嘗自多有遜唐四書文行于世

魏銚字時六龍溪人爲文高潔峻峭迥出塵埃之表康熙三十七年學使汪薇按部入漳貢成均有持其文質韓宗伯葵者稱曰天下士由是名噪都下爭禮聘爲師銚竟以定省故力辭南歸同時漳浦有蔡昉者薇批其文曰是卷墨淡行歌按其字畫幾如摩挲石鼓揭案後循例來謁問其年八十有二矣以崇禎壬午入學爲諸生垂六十年通經學古世無知者竟屈抑附學生中以老可嘆也又平和有廖進者薇批其文曰辭義高遠昌黎

所謂乾端坤倪軒豁呈露者童卷有此其淪落不偶可知孫陽何處是淚盡太行程吾將攀而哭之錄此誌學使者能得士抑二生之種學績文其梗概可見矣

論曰洙泗之門文學同科後世史氏旣傳儒林復傳文苑判文與學而二之何耶濂溪周子曰文所以載道也輪轅飾而人弗庸徒飾也况虛車乎今世所謂文皆虛車之屬也然其指事類情因物寫心出入乎有無之間消息于離合之際陸氏文賦詳矣至唐韓柳宋歐王曾蘊自言其所得力者窮畢生之精神庶幾焉然則文亦豈易言哉清漳歷唐宋元明以文鳴

者不乏人入國朝來各以詩文制義擅場其名見於二希堂集中及其後人錄送著作苟可存者皆採入藝文或來裔式微零文散帙皆其人情神所存亦陸續收之紀遺中并傳其人勿使姓氏湮沒如蔡昉廖進諸種學績文之彥失今不錄後世聲光無從窺尋矣恐海澨山陬湏洞杳冥中散佚而不傳者尚有其人也後之載筆者留意焉

以下

藍元枝

子

本俊

藍應元

孫全謀

羅士鈐

曾孫

光炤

蔡新字次明一字緝齋又字葛山漳浦人父衍鐔蚤卒新幼孤母教之喜聞性命之說從父世遠以理學倡閩南持愛之雍正壬子舉於鄉殫心經世之學乾隆丙辰成進士改庶吉士二年散館授編修是時

上命詞臣各抒已見日進經史講義以觀學術之淺深新進講義數十篇並蒙

嘉許謂新能承家學六年噶喇吧番衆殺漢商閩大吏上其事請禁止南洋商販以困之議未定內閣學士方苞以新留心經濟致書訪問新復書謂南洋事誠不法然漢商本皆違禁久居其地自棄化外名雖漢人實與彼地

番種無殊揆之國體實無大傷閩粵洋船不下百十號
每船大者造作近萬金小者亦四五千金一旦禁止則
船皆無用已棄民間五六十萬之業矣開洋市鎮如厦
門廣州等處所積貨物不下數百萬一旦禁止勢必虧
折耗蝕又棄民間數百萬之積矣洋船往來無業貧民
仰食於此者不下千百家一旦禁止則以商無資以農
無產勢將流離失所又棄民間千百生民之食矣此其
病在目前者也數年之後其害更甚聞廣兩省所用皆
番錢統計兩省歲入內地約近千萬若一概禁絕東西
之地每歲頓少千萬之入不獨民生日蹙而

國計亦絀此重可憂也愚以爲未須遽行議禁且沿海
文武官於商船回時再加詢問果其悔悟前非加意周
旋則是彼不敢與漢商爲難又何責焉如果輕侮漢商
則但禁噶喇吧不與通其餘南洋諸國如啞吡嗎宋轔
勝柔佛六昆等處仍聽從民便議遂不行九年典江西
鄉試十年奉

命直尙書房故事監察御史缺出行取翰林等官考試新試
第一應改補以願侍 皇子講讀辭有

旨以對品缺奏請授侍講時御史某劾鄉中有見首輔屈膝
者

上怒奪御史官問誰同見者某以新對

上問新新曰臣實見之

上然令出人或尤之新曰見之罪小欺罔之罪大君父之前不敢存趨避之見也旋奉

命終學河南有家子急於求售者微露請託意新曰秀才爲進身之始不可不端患得若此則心術品行可知竟不錄又有富室兄弟二人經錄取者爲怨家所毀議者欲以物議引嫌新曰吾惟知以文取士耳卒錄之秩滿旋京仍直

尚書房

上深知新通弦實開方之法因

命皇子於讀書餘閒兼資講究一日

上問阿哥所習算法孰優新對曰阿哥等天資明敏無難日造精微第此乃學之緒餘間有性非所嗜者只好聽之

上以爲然旋再典試江西授侍讀學士擢內閣學士遷工部侍郎移刑部二十一年典順天鄉試明年以母老乞養歸在籍奉到

諭旨命爲內廷總師傅新疏辭乞仍留侍養奉

硃批並非命汝卽來原待後日之旨也新歸養凡十年而後

還

朝途次補刑部侍郎旋奉

命視學順天除工部尚書兼署刑部三十四年攝兵部尚書

兼管國子事務調禮部尚書充四庫全書館正總裁

賜紫禁城騎馬并澄懷園直房四十一年再攝兵部尚書時

新年七十

御書武庫蒼英及紅絨結頂冠服賜之四十五年再典順天

鄉試轉吏部尚書協辦大學士四十七年請假修墓明

年旋京授文華殿大學士兼禮部尚書

賜黃扉宿彥匾額四十九年充會試正考官新以年近八旬

乞休

上御便殿問禮部尚書曹文植對曰臣不聞也

上曰同直內廷甯不相謀議乎對曰蔡新所言非部署之政

卽書房之課未嘗一語及私

上嘉歎久之五十年正月與千叟宴時內外臣工新年第一

寵錫有加二月上丁

臨雍講學新以大學士兼管國子監坐講天行健君子以自

強不息二句先是

御製三老五更說糾蔡邕獨斷父事兒事班固白虎通老更

各一人之謬至是

御製辟雍詩有蔡新或備伯兄行之句注曰若今之羣臣孰可當老更之席者獨大學士蔡新長予四歲或可居兄事之列新悚惶跼踖禮成因再乞休

允以原官致仕

加太子太師

御製詩章以寵其行有不忍言歸合令歸及歸言別又依依之句僚友及門下士賡歌稱頌新服官蒞政恪遵成法不喜更張故所至官府寂若無事性慎密凡有獻替不形奏牘雖同僚鮮有聞焉

上以新歸之後在朝無可與言古文者

御製詩文必寄令閱看以驗學詣使命絡繹在家如在京時五十五年

高宗八旬萬壽新進京祝嘏豐蒙

賞賚賜詩有祇問蒼生待忠告相看白髮尚依然六千里豈

江山隔一片心原上下聯之句五十七年壬子鄉試新

重赴鹿鳴宴六十年閩省倉庫虧缺事發

上責新扶同隱諱令疏覆因請交部議

上憐其衰老免議處嘉慶元年二月御史宋澍奏新家信內有言及洋匪情形

命傳詢新子本俊本俊稱新原擬具奏因屆年節不便呈遞

實已將奏稿寄交本俊賡真令遇有奏謝之便附入

上亦不責之無令傳

諭新不必稍存畏懼是歲新年九十

御書綠野恆春匾並諸珍物賜之復

賜新子本俊爲內閣中書四年新奉到

高宗純皇帝遺詔卽由漳浦北上至省城巡撫汪志伊見新

頗委頓奏俟秋涼護送進京奉

旨以新年逾九旬不必來京

恩賜新子本俊一體 殿試以部屬用是歲十二月新卒於

家遺疏入

諭曰原任大學士蔡新人品端正學問深醇久任綸扉兼轄

部務俱能恪恭奉職而在尙書房行走年分最久朕及

諸昆弟俱經授讀懋著慎勤著加恩晉贈太傅並著巡

撫汪志伊前往代朕奠酒以示眷念舊臣恩施無已至

意新有子四人並孫行達

諭令汪志伊擇其有出息者二人送部引見尋如例

賜祭葬諡文恭六年新孫行達

賜一體殿試八年奏請入祀鄉賢祠新家居設義學以待族

人之無力從師者又寘田收息以爲鄉會試資名曰稽

古祭田令宗支各立房長使自爲約束墓匪不靖之後

內地村落頗多標掠教以守望相助之誼乾隆五十九年漳州大水捐貲勸糶又置義倉以備荒歉設義塚以時掩埋修葺先賢蔡襄黃道周祠興廢舉墜疊疊不息長子本倣以舉人

特授工部屯田司主事先卒次本仗舉人官武平教諭次本任廩貢生官長樂訓導次本俊乾隆五十二年

欽賜舉人嘉慶元年

賜內閣中書一體殿試由刑部主事充順天同考官轉郎中每與同官言曰刑官不難於執法而難於原情吾曹所當共勉也二十年出知南甯府有惠政卒於官

藍應元字資仲一字古蘿漳浦人乾隆庚辰進士改庶吉士授編修歸葬父躬自輶土雜傭作經營備至三十五年入都供職

上知應元廉介欲大用之由卿貳擢禮部侍郎五十二年會試知貢舉冬視通州倉儲回京疾作遂乞休方應元充史館纂修時僚友有告以承權要者應元笑曰吾不以捷徑爲榮也服官三十餘年囊空如洗都門有藍佛之稱卒年七十一

藍元枚字卜臣漳浦人日寵子由世職隨標學習補廣東海門參將遷龍門協副將調海澄擢臺灣鎮總兵調金

門鎮遷江南蘇松鎮乾隆四十七年崇明大水溺死者
萬計元枚與巡撫閔鶚元議賑卹晝夜巡視全活甚衆
四十九年擢江南提督五十一年林爽文之亂調福建
陸路提督駐劄蚶江一帶接應時水師提督黃仕簡陸
路提督任承恩以觀望遷延撤回調元枚爲水師提督
復

命爲參贊大臣提兵由蚶江配渡前赴會勦五十二年六月
劉鹿仔港隨卽密會總兵普吉保於四更進兵前往柴
坑仔大武隴直攻賊巢斬獲甚衆

上嘉之復奏諸羅彰化道路梗塞近海民人紛逃鹿仔港臣
親至街市慰諭撫卹將難民壯勇者挑作義民給口糧
以資戰守又彰化淡水交界之大甲溪岸裡社地近大
里杙該處義民熟番不肯從賊現差弁曉諭令其進迫
賊巢分掣賊勢

諭曰參贊藍元枚自抵鹿仔港以來一切調度合宜打仗得
勝伊係藍廷珍之孫能繼家聲實爲可嘉著賞戴雙眼
花翎以示優眷續奏前後攻擊埤頭莊大肚溪並焚毀
西螺條圳塘中浦厝各賊莊及族人藍啟能自漳浦察
逃出熟識山路隨同進勦其中如有曾經從賊者仍請
查明正法

上以所辦公當可嘉賞給緡絲蟒袍御用大小荷包以示獎勵旋以遲回觀望奉

旨嚴飭未幾疾作適賊由竹仔脚大肚溪柴坑仔三路來犯猶力疾帶兵堵禦病亟屬諸將曰吾在軍卽以征衣殮死而有知必來殺賊八月卒

特贈太子太保

賜祭葬諡襄毅子誠襲職

孫全謀字澹亭龍溪人其先籍山西曾祖惟福以從征噶爾丹功借補福建汀州中營把總因家於漳焉全謀少喪母家貧落魄不偶慨然曰吾將種也當立功海上乃

至廈門投水師補提標中營外委累遷至後營遊擊乾隆五十一年臺灣林爽文滋事提標柴大紀督兵守諸羅賊多兵少急於望援全謀從總兵蔡攀龍由東北路馳至大崙竹仔脚伏兵發全軍陷於正音莊將弁被害者二十餘人惟全謀與蔡攀龍突圍而東且行且戰直抵諸羅城全謀復領兵出城將屯聚賊匪痛勦事聞授廣東羅定協副將

賜戴花翎調臺灣水師協副將擢江南蘇松鎮總兵移浙江黃巖鎮時洋匪紀夢奇等劫官米全謀領舟師自定海駛至大陳山外洋乘賊不備冒風雪往勦擒獲賊首又

勦洋匪陳阿寶於潭頭洋殪之擢廣東提督嘉慶五年
川陝楚三省教匪作亂

上調廣東官兵赴楚全謀領兵協剿徐添德大敗之增一秩
未幾博羅縣會陳爛辰四聚眾謀不軌全謀統官兵分
路進連破十五寨殲三千餘名陳逆竄入羅浮山燬華
首臺寨擒之殲其黨千餘人博羅平安永安縣屬青溪天
字嶂鑄籠嶂等處賊竊發全謀移師前指諸寨皆下首
逆黃亞程被擒伏誅永安亦平叙功

賜騎都尉世職後因洋盜登陸削秩降都司禱花翎又因蔡
牽竄入粵洋削秩旋從提督錢夢虎剿賊於黑水洋奪
賊船二百餘人擢廣東左翼總兵官復授廣東提督是
時廣東洋匪縱橫出沒張保仔烏石大尤桀黠總督百
齡檄全謀會剿於大黃埔以全謀失期致張賊遁去奏
奪職未幾洋匪郭婆投誠併擒保仔黨以獻

上宥全謀命立功自贖全謀從春江協副將林某西干勦捕
至電白洋生擒盜朱亞寶等一百三十九名以守備起
用時烏石大等在儋州洋滋擾全謀率兵往捕登其舟
弁兵踵之生擒烏石大等四百九十人事聞復

賜戴花翎以遊擊擢用累遷至陽江鎮總兵擢廣東水師提
督卒年七十三孫雲鴻襲職全謀勇而廉方其禦臺逆

也賊礮發傷胸暈絕鉛子倒飛去復蘇遂克敵及張保
仔之逸賊飛語全謀受賄萬金奉

旨詰詢百齡奏賊言得全謀頭者萬金不聞受賄也且力言
全謀必能辦賊故能成其功

羅士鈺漳浦人康熙十八年應康親王募以勦海寇功授
左都督洊陞水師提標中軍副將從提督施琅平臺署
爲前部大戰劉國軒於澎湖破之遂平澎臺三十六島
前後殺賊一萬三千餘名叙功

給騎都尉世職三世擢湖南鎮守鎮總兵未赴卒第士鉉亦
以功授右都督子鳴淇襲職洊授浙江溫州中營遊擊

卒於任曾孫光炤

光炤字映寰一字朗亭先世居粵東饒平縣以曾祖士鈺
入籍福建遂爲漳浦縣人父若桐例應襲職不仕以光
炤承襲補閩安水師營都司乾隆五十一年林爽文滋
事光炤請從剿明年正月抵臺戰累捷復鳳山縣城賊
圍三坎店營光炤分兵四山爲疑陣已乃當先搗入殺
賊二百餘解其圍賊轉攻柴頭港塩埕光炤壘塩爲壁
以守與賊五戰克之保固全埕先後擒賊目蔡懷蔡陣
等通東港運道七月賊圍嘉義急光炤馳援賊稍卻官
軍得入城又數日賊大至僞帥擁幟攻城光炤望見直

博之賊礮雨發飛鉛中曾背救歸越兩日始甦而鉛子已嵌入骨令醫剜之不得出久之傷始平復十一月戰於番社賊大創圍始解五十三年正月從叅贊蔡攀龍辦賊中路擒偽職楊君選龍堤等於戶定山參贊海蘭察光炤能任以行營收訊事時各路解獲日數十起每起數十百人男婦雜沓因創編竹牢分別脅從初犯再犯有無傷官軍以定其罪童穉及良家婦女被掠者給親屬領歸全活甚多完操者亦不少光炤嘗曰吾生平鮮得意事惟辦收訊時自問無疚心焉臺灣平遷澎湖左營遊擊嘉慶元年調江南奇營遊擊二年擢川沙營

參將赴部引

元是日

睿皇帝奉

太上皇於

乾清宮詢在臺打仗情形

命御前大臣驗視傷痕頭等

賞戴花翎是冬丁父憂假歸卜葬穿壙得朱棺不知爲誰氏

衆議起遷光炤不可揜之誌以碣而改卜焉以回任逾限調狼山營遊擊累遷吳淞營參將擢京口副將京口多私臬前此專陸捕光炤大治哨舟授以水戰法沿江

臬販多就捕江境肅清二十四年授浙江黃巖鎮總兵時洋面多盜以緝捕為急而經費弗充光炤核實通籌節他項之糜者益之於是費裕緝勤盜亦尋止時議南田山開禁召墾撫臣以詢光炤謂南田懸海數百里草樹蒙密易於藏奸召種未必為鄉氓衣食之資適足供奸盜藏身之固宜撥官弁分巡戍守冬則焚其柴草俾奸宄無所容巡撫如議入奏得

旨下部議行道光九年以年老原品休致歸卒年八十光炤見事有識御下有恩戎政餘閒不廢吟詠在狼山任日啟百蝶詩社與胡長齡馬有章馮元錫等相唱和為一時名流之盛所著有朗亭詩存藏於家

黃元坡

陳垂

鄭天池

李先開

曾萼

黃元規

鄭元鏞

子開禧

黃亮國 原名步蟾

黃元坡字辛子海澄人少慧能詩順治五年貢生歷南安汀州教職造士有方改華亭縣主簿華亭故詩藪也與童俞廬元昌等相倡和江南財賦之區簿主糧元坡在職庶無紅朽輸白糧之京無留難者督撫奇其才令攝吳縣靖江事無不舉攝丹陽適

禁旅往來供應無乏而民不擾年未及遂乞休華亭人留之俞亦勸曰昔人憶尊鱸賦歸茲尊鱸鄉也舍之何適於是笑而從之遂不請

陳垂字次和漳浦人順治己亥

特

舉會試成進士知廣東臨高縣撫綏九載有惠政康熙十

五年遭亂賊逼授偽曹垂峻拒之事平將優叙會高涼再梗留郡防弭以瓊州同知終祀忠義祠

鄭天池字扶九又字滄涯龍溪人康熙癸酉舉人謁選得甘肅隴西縣隴西故邊邑地瘠民貧又當羌戎甫定瘡痍未復天池問疾苦釐宿弊禁火耗省刁訟與民休息

兩載民氣稍蘇則進其爲士者而教之孝弟諄諄如家人相告語調權安定西和兩邑又權階州牧篆治行爲甘省最上官將以卓異薦會西塞用兵隴爲衝道軍書旁午以勞瘁成疾告歸宦橐蕭然老親尙存授徒以供甘旨

李先開字春谷漳浦邑諸生由教諭改縣丞雍正七年擢山東安邱知縣慎刑獄愛民如子蒞任三月以疾告歸僉曰三月父母教養之恩勝於三年爲立碑以誌不忘曾萼字麗元平和人乾隆辛未進士知廣東恩平縣興利除弊民稱廉正築熙春臺爲每歲勞農之所公餘與俊

秀講肄勉以立品遷建南平書院置書籍厚廩給定課
程士民興學焉歷五載攝潮陽俗健訟萇平情聽斷訟
獄衰息值颶風壞城垣隄岸竭力修葺賑給貧乏復捐
修鄉賢節孝祠調電白遷廣州府海防同知移連州直
隸知州州婦女罕習女工教以紡績無游閒者有峽口
灘水湍急舟輒壞萇相地開鑿商船便之以告養歸

黃元規字仲模平和人乾隆己酉舉人嘉慶六年分發浙
江試桐廬知縣事值歲飢米價騰貴元規捐俸平糶以
爲紳士倡民不之食攝金華聽斷明決人不敢欺有錢
薛二姓自幼締姻後以貧故欲離婚元規卽令於公堂

合香以鼓樂導歸復權永嘉華蓋山雙忠祠祀元規捐
廉重建暇則於東西講院課士衡文民爲忠愛廉明四
詩以頌其德補平陽知縣於沿浦地率民築埭數都均
受其益以勞卒於官民醮金歸其權立祠於城隍廟側
祀之

鄭元鑄字蘊席又字畚田龍溪人貢生十二歲喪父事母
林以孝聞兄病躬湯藥同寢室數月無怠所居馬洲瀕
大溪乾隆庚寅大漲居人盡避於山時元鑄父柩在堂
乃以纏約諸楹立水中號泣數晝夜守之聞者愴惻母
疾草遺言外氏微懼之祀元鑄泣曰是在兒乃以田若

干附外祖外祖母栗王於林氏支祖廟家素貧習賈質
 稍裕均諸兄弟無纖毫自豐次兄卒撫其孤如已子族
 諸生鴻英無後以已田祀之海澄諸生柯永才不偶命
 元鑄數振其困柯歿母老子弱為醵金立產業使無餒
 凡事所當為必為之有施於人旋若忘之未嘗言於人
 以子開禧貴

贈中議大夫

開禧字迪卿又字雲麓元鑄子龍溪人嘉慶甲戌進士授
 內閣中書轉吏部員外郎歷掌稽勳考功二司印遷文
 選司郎中精於吏治奸吏不敢玩法出分巡廣東糧儲

道適搖民寇粵 大兵征討軍輸旁午臨以整暇事平
 又值南海三水清遠三縣水災桑園諸基圍俱決漂沒
 民居流離飢殍請賑不及開禧首先捐金設法收恤全
 活以數萬計遂力任隄防永禦水患粵人德之建祠以
 祀大吏嘉其稱職奏署本省運司不數月積弊盡除商
 賈利之擢山東都轉鹽運使之官道卒開禧事庶母謝
 為之請 旌任粵日漳洋販四十餘人巡海卒以為盜
 執之官開禧白其冤盡釋之著有知守齋詩文集行於
 世

黃亮國字輝秋號鏡潭原名步蟾長泰人嘉慶辛酉拔貢
光祿寺署正揀發山西歷任遼陽絳平定保德霍解沁
等州牧代理河東兵備道兼山陝河南三省鹽法道爲
政廉恕明敏凡有興革無不捐俸毀家以便民其在絳
也聞喜有蠹役強篡旣受聘女訟與其令誤坐本夫罪
亮國廉得其情寘役於法州人譜爲傳奇其在解也有
兄弟爭產構訟使其跪三義廟卒相與媿悔亮國居鄉
慷慨好施友于尤篤著有詩文草數卷藏于家子存錫
邑諸生工楷法喜吟咏惜享年不永

劉希周

希孟
希程

鄭玉振

魏炳

葉觀海

鄭經邦

劉希周字起濂號東溪長泰人祖鼎鉉有傳父登芳母楊
孺人爲優行生員楊貴之女以學問爲閨閣師著有女
史論勉女子讀書論希周兄弟皆就母問業嘗於元旦
其母猶續三子環侍讀書聲聞戶外路人過之贊嘆不
已希周乾隆辛酉拔貢甲戌聯捷進士授夾江知縣有
政聲以丁內外艱回籍遂不復仕嘗曰仕以爲養今二
親旣不在矣予惟知授徒自給勗第成名二者而已時
漳中藏書最富者推希周與海澄葉廷推二家丙申修
志出其書畀借之當事敦請王修決辭不就以爲修志

者必先絕請托苟有不能奚可也希周在籍十餘年方正自持不事干謁一時從遊極盛每歲科獲雋者半是劉門弟子卒年六十有八仲弟希孟乾隆壬申舉人季弟希程乾隆己亥舉人俱邃經學時稱西門三劉

鄭玉振字聲伯號愚亭別號古邨龍溪人乾隆甲辰進士嘗受業於劉東溪之門穎慧過人詩韻講章世所爲不可讀者一見輒無遺出宰和順縣時縣轄有婦人產後冒風死外氏索賂曰死非由病迫而自鴆也玉振往驗見屍中流出白點凝結成塊手曰剔取審視蓋屍蟲之始蟄者顧無他異知非鴆詢其左右鄰里皆曰誠然病

命收以埋因反治來告者罪幕客止之曰其人至黠設控於上官我反受其禍不如釋之第使受誣者得直不亦善乎玉振曰因黠而縱之是以黠爲教也慮禍而舍之是示民以無刑也民將效尤卒治之瓜期甫及以奉檄解餉潼關勞頓成疾引告旋里士民率衆至省懇留以捍於例相與咨嗟涕淚多作歌詩贈別里居時乾隆乙卯漳大飢當道議施粥玉振捐金首倡廣糴以賑活人無數嗣請改教爲延平儒學教授訓士之外概罔聞知蓋以官爲隱焉著有詩文集古村閒話雲洞讀韓若干卷俱未梓

魏炳字虎卿號勵軒龍溪人補郡廩膳生淹博經史試輒
冠軍乾隆四十五年學使朱文正公按部入漳以河源
策考士得其卷謂教官曰是卷考據詳明亟拔之以爲
通經學古者勸刻其文於校士錄時

純

皇帝命儒臣考輯河源一書炳爲人砥礪廉隅言笑不苟
每年終計所得廩俸暨修脯贏餘者以潤族中貧乏世
習儒惟父國蘭習賈未嘗負人一錢而爲人負者無算
既不責償或反有所助國蘭平生誠實勤儉爲子擇嚴
師教督進士劉東溪希周嘗滿之至今數傳恪守長厚
之風書香不替

葉觀海字汾浦詔安人拔貢生博覽富著述絕意進取時
縣志自康熙三十年後未修慨然以文獻爲己任補闕
拾遺刪繁訂誤凡三易彙始成學宮兩廡水主位次淆
亂先賢名氏舛訛名宦鄉賢忠孝等祠水主尤多失據
悉爲參稽而釐正之

鄭經邦字渭卿一字槐庭龍溪人道光己亥舉人事親至
孝父高年尙業賈於東廂朝出暮返經邦每日斜必往
梧栖里立以待之隨侍而歸寒暑風雨無間授徒三十
餘載文行並勗束金之外毫不苟取觀察周立瀛慕其
品學欲聘爲書院山長固辭之終其身未嘗干謁一有

司亦不著書以要譽年已七十無疾而逝及門哀輓有
曰孝曰廉心跡畢見以文以禮警效常存之句咸以爲
實錄云

陳名魁

林國良

曾超羣

陳名魁字孚九漳浦人乾隆辛丑武進士授處州守備歷
金門左營遊擊移廈門又移銅陵土寇陳興等據梁山
劫掠名魁設法招撫之擢閩安參將五載威名大著錄
功遷東海門副將時海寇滋擾廣東艇匪尤甚名魁俘
陳合於南日囚林三於將軍澳獲羅阿義於清水洋擒
吳興信等於獺窟獺窟賊所出沒興信在艇中有驍名

賊黨氣索海寇蔡牽之先有林潭者呼爲海鳥最趨捷
嘉慶元年潭泊石圳名魁率師殲之又哨至湄洲遇柯
佛船佛號白銀先在浙洋劫鎗礮名魁麾兵急擊遂繫
佛等四年春裨將某被圍崙山洋帆挂賊纜弗能解各
魁至呼軍士竿月鏹斷其繚得解因追擒曾元等奪其
礮械舟次狀元澳賊瞭知爲名魁也遂駕小船走名魁
亦下杉板追及之有浮水去者有逃入山者名魁率健
卒搜山與盜首黃敬發徒搏縛之又嘗令把總張高生
僞爲商人誘賊魏港等名魁從上風掩至夾擊之覆其
舟名魁形短小鬚盈尺英悍之氣逼人能詩知兵爲李

長庚所重當其樓船出海或雲日晴和或風雨紛至坐間忽命轉帆催櫓指麾人某灣襲其港至必遇賊遇輒成擒所俘馘多報軍士功故人樂效死焉以其善刀眾呼為陳大力後會哨南澳回至牌角灣猝遇賊船窺官軍單弱死力抵拒名魁身被二十四創援不至被戕

賜卹如例世襲雲騎尉祀金門昭忠祠

林國良海澄人父芳征臺灣死事

賜世襲七代輕車都尉國良以廕積階至厓門總兵嘉慶十

三年海盜屯舟九龍口國良往擊之戰甫合而紅旗幫船且百號迴環相向國良督將士拋擲火器自辰至未

戰益力適黑旗幫船又至勢遂不支國良素善跳盪知事不可為手利刃躍上賊舟連殺十數人遂遇害沿海居民賴國良為保障及其死也巷哭相聞焉

曾超羣平和人膂力過人開十二力弓矢無虛發授同安營把總乾隆五十二年臺匪林爽文滋事從大學士福康安至臺征剿遇賊奮勇爭先至大城厝與賊戰陣亡

賜金一百兩祭葬給雲騎尉世職襲次完時給恩騎尉罔替

徐萬鍾 徐希淳 陳仲愷 陳江 沈韓

曾祈賜 林松齡子林 歐陽城 楊維棟

曾廷祖

曾孝讀

曾光采

曾仕伯

徐萬鍾龍溪人補弟子員性行純篤嘗夜讀有鄰女來奔峻拒之其所行不求人知而里黨無不起敬者同里有徐希淳鬻子以葬父母道光十二年

旌表

重纂通志

陳仲愷南靖人幼喪父母事兄熙伯盡敬熙伯以所置產讓仲愷仲愷復讓季弟希仲希仲善病愷每得漫苓藏以餌季新衣表衣季而白衣故衣友愛之聲動一時知縣聞而旌之重纂通志
陳江詔安人少孤訓蒙以養母晨夕親自炊爨俟母膳後

乃赴塾得美味必馳以奉母鄰人邀飲遇佳品則留少許歸以遺母江母嘗養一女女兒江江亦妹之及笄母欲以妻江江長跪辭曰既為兄妹則不當為夫妻母不能強乃嫁之江屢之食鄰周之不受人知其廉間託繕書乃受直非其力不食重纂通志
沈韓詔安人少喪母事父每飯必求珍味佐膳雖遇嚴寒必取漁具入港汊得魚蠓佳者以進人雖多與直不售也父見幼孫侍側輒呼分甘韓進曰老父自嘗兒童何能知味父曰老人弄孫孫飽則老人亦飽韓不敢復言後父將食令妻携兒他去俟翁食畢乃歸鄉族皆稱之

韓家貧賃屋以居居停主人子弟以負稅故將逐之王人曰吾重其孝欲使長居廡下使汝輩稍知矜式則所

獲屋租多矣

重纂通志

曾祈賜龍溪人少喪父獨與母居母嘗沈病數年羣醫束手祈賜侍疾衣不解帶憂苦備至一日忽有老翁自鶴鳴山來曰聞子事母孝特來作醫取囊中草授之曰和肉煮食當愈祈賜酷貧不能得肉遂割股和藥以奉母食畢疾愈往謝鶴鳴山老翁遍尋不見人皆歎為孝感所致里人陳吏部贈匾曰奇孝驚天徐縣令贈匾曰至孝天成祈賜卒于康熙十二年享年八十二歲咸豐七年

年題准

旌表

林松齡號讓齋龍溪翰林里人為入守正不隨波靡急病讓夷多行利濟事橫逆來每置不較嘗誦李安溪先生語曰吾平生無所不讓人惟讓之一字不以讓人尤敬重師長禮意殷勤無倦久困童子試援例入監晚年坎壈特甚家私散盡避賊難遷居郡城長子邠次子湘皆諸生孫廣顯廣獲廣邁皆舉人

邠字瑞嵐食貧力學脩行功過格夙興夜寐孜孜不倦湘字衡南至性孝友於祖宗坟墓祠宇力事護持臨財不

苟行年二十餘卽以施濟爲事歲入除家用及買書籍外皆爲周急費盡族有告死喪者雖囊無餘錢必典質分憂終其身如一日世稱爲孝子蒿圃先生咸豐七年旌表

歐陽城漳浦人孝友道光十六年十二月十六日奉

旌表

楊維棟漳浦人監生五歲失怙母守苦節獨撫維棟髫年卽具至性業漁奉母比稍長勤積餘貲爲貿易計以備甘旨生子能代其貿易卽脫身歸家朝夕與母對榻不入婦室凡母瑣屑之役至浣褻衣滌溺器皆身自爲之

子婦憫其耆年任勞請代皆弗許平居以財物周窮急必稱母氏之命母卒哀毀逾年亦卒壽六十六咸豐間

旌表

曾廷祖平和人海氛時流寇犯邑全家被陷廷祖年十四

捐生以赴賊感其義舉家獲免

漳海表微錄附錄

曾孝讀平和人海氛時流寇縱火焚其母棺孝讀以身護

棺竟免於火鄉里號之曰孝讀其名也

漳海表微錄附錄

曾光采平和人有族親恃強佔兄弟產者其兄仗義爭之

誤斃強者控官擬獄光采與兄爭獄代兄以死

漳海表微附錄

曾仕伯龍溪人家貧事親能得其歡心與婦楊氏晝夜力

作以供甘旨每日必攜百錢市芳鮮以進親病必躬侍
湯藥兄早卒撫兄子如子爲之婚娶成人母家及父妹
家三遭喪不能葬皆爲竭力經紀其事表兄嫂晚年瞽
目貧無依倚衣之食之終身無所吝族有窶子欲出售
其母冢地者急給以直而止之年七十五卒子省道光
甲辰舉人咸豐七年紳士彙舉籲請
旌表崇祀孝弟祠

漳州府志卷之三十三終

